



類函三



卷四六帝王
四七帝王
八帝王

427 ³
427
22



13



新念圖書

此係明治八年八月
月廿八日
諸山田一人
悼君釀資
所購以贈

早稻田書印

淵鑑類函卷四十六

帝王部七 帝王總裁

帝王總裁十

詔

敕

令

箋

增 詔唐永昌元年改正朔詔曰朕聞上皇纂曆則天地以裁規大聖握圖法陰陽以施化故能牢籠品類陶鑄生靈敷景運於休期闡洪基於光大昔有隋失馭率土分崩赤縣為禾黍之場蒼生遇塗炭之酷我高祖龍興汾晉鳳起寰區殄梟獍而安八荒翦鯨鯢而清四海太宗膺昊穹之曆敷鼓雷電之雄威服遠冠巢燧之前開邊越義農之際鴻名邁於三五茂績隆於往初高宗稟

雷澤之禎符降天縱之神器湛恩所被匝乾坤覆載之
鄉至化所覃盡舟車所通之境撫璇丹極輯瑞蒼嚴天
平地成淳風啓千年之運樂和禮備寶祚隆三聖之基
逖聽王猷熙開帝載朕以虛薄虔奉睿圖業業兢兢不
遑寢食幸穹昊貽祐宗社延祥河薦合天之符洛出永
昌之籙時和歲稔遠肅邇安斯皆先德所延屢彰嘉貺
自恭臨兆庶已積炎涼尚想移風未臻於至道顧循菲
德媿切於深衷思弘顧託之恩再闡混元之始夫元穹
列象三辰以之麗天厚載含章五行於焉紀地易曰三
五以變錯綜其數遂成天下之文定天下之象水火相

變其卦爲革象曰天地革而四時成言五德更相生變
革萬象故帝者改正施教明受之於天不定之於人者
也自五帝纘統三王馭宇或父子相承同體異德或金
木迭改應天順人故納麓登庸粵受終於文祖干戈革
命必理曆於明時然則開元配永肇自陽來之且統曆
履端基於朔易之首孳萌發內氣律由中品物任而昭
蘇生類蕩而敷革是知夏之人統不逮殷之地正殷之
地正有劣周之天統元命所苞實在茲矣周文稽古制
禮於成王之日漢高握德改元於武皇之代則知文制
大備未遑於上業損益之道諒屬於中平朕所以遵飾

禮經奉成先志今推三統之次國家得天統當以建子
之月爲正考之羣藝厥義明矣 中宗興復神龍開創
詔曰聞天地盈虛四時有消息之度皇王興替五運有
遷革之期稱號斯殊驪駟亦異受明命者罔不由茲我
大唐高祖聖期首出天與神器有大功於區夏有大造
於生靈太宗道則繼明業推構極類商湯之起亳若姬
發之承周彈壓九皇宰籠萬古高宗上聖御圖大明司
契手調元氣心運洪爐齊五緯而平太階應三神而登
日觀羅網開闢包冠義胥大猷備闡能事斯畢僊駕不
追逆臣開釁敬業挺炎於淮甸務挺潛應於沙場天柱

將搖地維方擾非撥亂之神功不能定人之危矣太后
亶聰成德濬哲應期用初九之英謀開太一之宏略振
玉鈴而殫封豕仗金鉞而斬長鯨受河洛之圖書當昊
穹之曆數惠育黎獻並登仁壽旣而凝懷問道屬想無
爲以大寶爲勞生遂復忝於明辟且有後命俾承先緒
光啓大唐之國用崇興復之基交際在辰情深感愴奉
高祖之宗廟尊太宗之社稷不失舊物實在於茲業旣
惟新事宜更始 蘇頲睿宗禪位詔曰天下神器非上
聖無以運其機域中大業非元良無以固其本欽若靈
命寅奉神宗屈已順人用安四海承祧主鬯實貞萬國

頃者家臻大憫在疚惟憂梟獍滿衢豺狼塞路社稷之
守但望苞桑忠義之懷誰期艾棘階禍稔惡伺隙乘間
煩言碎辭所不勝述皇太子隆基正氣凝姿端命毓德
自家刑國英徽日甚移孝為忠雄謨電發北軍馳入埽
攬搶於紫微南宮反正開日月於黃道平亂寧國翼戴
朕躬一旅不勞功逾復禹七德咸舉事邈興周聲應吹
銅望當歸璧令司空讀冊侍中授璽實由立義豈曰尚
親承華肇開元嗣以建方流樂風之緒宜申洊雷之澤
朕爰初踐極喜氣呈祥天人叶心象緯昭貺官名有紀
年號用憑 開元受禪詔曰繼明嗣德王者所以承天

尊祖奉先聖人所以崇孝敬上之禮著乎重華月朔之
祠襲乎文命倚歟作頌發流濬哲之祥清廟升歌思表
配天之業歷選前載可得而言我國家首出開元繼文
膺統七代觀德至道洽於生人三后在天垂裕光於後
嗣太上皇帝道超寰表功軼帝先名言不測於乾行仁
智不知於日用累讓神器非以黃屋為尊俯膺大寶蓋
為蒼生屈志黎人於變淳化斯登載懷脫屣疇咨菲薄
竭讓德之志天眷莫迴陳拜首之誠中襟逾邈遂以寡
昧祇踐宸居循顧紹庭載深寅畏爰撰初吉躬展肅雍
虔肆獻之儀申大號之典神保之饗斯洽介福之道攸

宣億兆同歡人祇共慶 蘇頲開元元年詔曰朕聞聖人無心同於吹萬上皇有道契於明一居天下之尊者至大體其大以照臨成天下之務者至公順其公以康濟故能稽昌曆考元符通於神祇格於上下鴻名不可以深拒盛典不可以固違斯豈在予而徇物也朕以菲德丕承聖訓掃除攬撙保衛宗稷內問安以承志外聽理以推誠始自朝廷納之以軌物終加蠻貊洎之以聲教欲令跂行喙飲含齒戴髮去其天札蠲其疵癘每兢競於紫座寧自貴於黃屋而凡我羣辟顧斯兆庶以爲人謀協從天意欽若王者人所歸也帝者天之號也歸

之者以德號之者以功然號以功成則功不可以不表歸以德厚則德不可以不勵朕猥屬與能之運遂忘沖讓之私將逮建寅之歲首甫擇建子之天統是用發揮景運受茲禮冊夫循名者責實謀始者慮終勉而全之非敢自滿所以克己思政惟懷永圖懼弗勝荷用多慙惕 天寶改元詔曰古先哲王之致理也皆上順天心下稽人事時令贊發生之重祥符叶紀年之稱考彼前載斯爲大猷朕嗣守丕業洎三十年實賴宗社降靈昊穹孚祐萬方無事六府惟修寰宇晏然庶臻於理然則乾元在上仁覆爲首皇王臨下惠化攸先恩弘善貸用

廣慈育尊天寶之建元暢皇風於不宰况屬陽和布氣
獻歲發生宜覃在宥之恩式降維新之澤 元稹文武
孝德皇帝冊尊號詔曰昔我高祖太宗化隋爲唐奄宅
區夏包舉四海全付子孫其何事哉彼昏盈而我勞敬
也明皇承之能大其業六戎八蠻罔不貢奉由是庶尹
弛政庶吏弛刑視人不勤視神不謹燕寇敦起洞無藩
籬其何事哉據逸安而易萌漸也逮我聖父勤身披攘
斬斷誅除天下略定曾是幽冀賜子懷來荷賴景靈不
訓不墜環歲之內四方平寧粵予何功時帝之力而卿
大夫猥以大號加於眇身讓於四三益甚其請皇太后

如聞其事歡然慰心慈旨下臨臣誠上迫祇受大禮凜
乎余懷今卿大夫謂我爲文武孝德矣其將何道以匡
予予其業業兢兢日慎一日慕陶堯虞舜之行以自勉
思文祖憲考之道以自勤予苟不思無忘納誨於戲溢
美之名既不克讓及物之澤夫何愛焉 憲宗上尊號
詔曰朕聞惟人戴后因事必極於推尊惟辟奉天有善
必歸於讓德在敷景化以答元功居有勞謙之思進多
滿假之懼緬自遠古何嘗不由是而致理焉朕獲纘睿
圖祇膺神器上奉大祭下安羣生恭已臨軒兢兢懷馭朽
志欲周於四海念常切於一夫旰食宵興唯恐失墜運

屬休泰時丁小康方隅廓清氛祲銷盪斯乃上荷乾坤
之垂祐宗社之降靈下賴卿士之叶心戎臣之宣力端
拱嚮道推誠任能豈予寡昧用集丕績况至化猶鬱勤
憂未寧而中外臣僚文武多士累陳懇疏並進昌言願
獻鴻名以增虛美拒衆心而率籲轉切顧眇身而內愧
靡安乃撰吉辰爰受典冊禋告於清廟虔聞於昊天當
茲盛儀夕惕增厲於戲朕自御極再加景號在徽章而
孔備諒浮實而多慙宜因行慶之辰誕布惟新之澤與
物咸遂永孚於休 武宗上尊號詔曰昔我高祖太宗
始造區夏闢乾坤以覆載揭日月以照臨盛德耿光格

於上下昊天有成命我二后受之列聖不圖克大其緒
文綏武靖奕葉連枝逮予纘脩罔敢失墜誠欲追蹤在
昔貽範將來陶末俗於至和返太朴於已散而道不足
以居域中之大文不足以成天下之化恭已南面夙興
夕惕遐想理古歉然於懷至於嗣歲豐穰寰海康靜祇
疹滅息華夸大同茲實監祐自天匡救在下諒非已出
安敢自多而三台百辟陳忠瀝懇加我大號其何以堪
謂予守文宜述先志抑而不行者三請確而不拔者羣
誠豈貪在己之名姑念從人之欲祇膺典策良深惕勵
今維夏長養之時動植之物莫不自遂思有以導迎和

氣生活吾人是用稽犧經之作解法虞書之肆赦推恩
宥過思與同休 宣宗冊尊號詔曰我國家披皇圖以
立極執大象以升中睿父嗣孫重熙累盛逮予稽古聖
孝詔復中興洗滌宿氛廓開昌運天命不易賜予元符
荷宗社之耿光致寰瀛之小泰于戈載戢風順雨時豈
予菲薄汔此肅清皆中外元僚文武多士同心協贊而
使之然益用兢兢以戒盈滿而乃累陳丹懇願上鴻名
牢讓不從瀝誠彌切於戲昔賢有云舜何人也我何人
也苟或讓之不遂予亦敢不思齊今百執事謂予曰聖
敬敢忘繼志之義以是自勗庶無悔焉浮實之名旣不

獲已乘春之澤當務惟新 懿宗嗣登寶位詔曰朕聞
龍之騰天漢也則必乘風雲鼓雷電以震六合君之踐
大寶也則必敷仁惠煥號令以煦萬方是以地不間於
幽遐事罔論於輕重洪聖興而皇渥溥德音振而庶類
蘇故愆咎咸除枯沈盡起斯皆前代令典國朝成規委
轡諒戒於惠奸凝命始懷於布澤肆予寡德嗣繼丕圖
夙夜乾兢若俯泉谷永維我高祖太宗之艱難締構又
維我列聖之慈儉統承思所以克紹休明弘濟億兆剴
毗俗之弊清理化之源肇祥導和應天順物致驩心於
率土知恭已以臨人爰申在宥之恩用洽維新之慶

宋太祖登極詔曰五運推移上帝於焉眷命三靈改卜
王者所以膺圖朕起自側微備嘗艱苦當周邦草昧從
二帝以徂征洎虞舜陟方翊嗣君而纂位但罄一心而
事上敢期百姓之與能屬以北敵侵疆邊民罹苦朕長
驅禁旅往殄塵氛鼓旗纜出於國門將校共推於天命
迫迴京闕欣戴眇躬幼主以曆數有歸尋行禪讓兆民
不可以無主萬機不可以曠時勉狗羣心已登大寶昔
湯武革命發大號以順人唐漢開基因始封而建國乘
時撫運既叶於謳謠及物推恩宜周於華夏於戲革故
鼎新景物初隆於王室青災肆赦鴻恩普洽於民心更

賴將相王公協謀同力共裨寡昧以致升平凡爾萬方
咸知朕意元王鸚世祖即位詔曰朕惟祖宗肇造區
宇奄有四方武功迭興文治多闕五十餘年於此矣蓋
時有先後事有緩急天下大業非一聖一朝所能兼備
也先皇帝即位之初風飛雷厲將大有為憂國愛民之
心雖切於已尊賢使能之道未得其人方董夔門之師
遽遺鼎湖之泣豈期餘恨竟弗克終肆予冲人渡江之
後蓋將深入焉乃聞國中重以僉軍之擾黎庶驚駭若
不能一朝居者予為此懼驛騎馳歸目前之急雖紆境
外之兵未戢乃會羣議以集良規不意宗盟輒先推戴

左右萬里名王巨僚不召而來者有之不謀而同者皆是咸謂國家之大統不可久曠神人之重寄不可暫虛求之今日太祖嫡孫中先皇母弟之列以賢以長止于一人雖在征伐之間每存仁愛之念博施濟眾實可爲天下主天道助順人謀與能祖訓傳國大典於是乎在孰敢不從朕峻辭固讓至於再三祈懇益堅誓以死請於是俯循輿情勉登大寶自惟寡昧屬時多艱若涉淵冰固知攸濟爰當臨御之始宜新弘遠之規祖述變通正在今日務施實德不尚虛文雖承平未易遽臻而饑渴所當先務略舉其切時便民條列於後嗚呼歷數攸

歸欽應上天之命勲親斯託敢忘烈祖之規建極體元與民更始朕所不逮更賴我遠近宗族中外文武同心協力獻可替否之助也 又中統建元詔曰祖宗以神武定四方淳德御羣下朝廷草昧未遑潤色之文政事變通漸有綱維之日朕獲纘舊服載擴丕圖稽列聖之洪規講前代之定制建元表歲示人君萬世之傳紀時書王見天下一家之義法春秋之正始體大易之乾元炳煥皇猷權輿治道可自庚申歲五月十九日建號爲中統元年惟即位體元之始必立經陳紀爲先故內立都省以總權綱外設總司以平庶政仍以興利除害之

事補偏揅弊之方隨詔以頒申畫於后於戲秉錄握樞必因時而建號施仁發政期與物以更新敷宣懇惻之辭表著憂勞之意凡在臣庶體於至懷徒單公履建國號詔曰誕膺景命奄四海以宅尊必有美名紹百王而紀統肇從隆古匪獨我家且唐之爲言蕩也堯以之而著稱虞之爲言樂也舜因之而作號馴至禹興而湯造互名夏大以殷中世降以還事殊非古雖乘時而有國不以義而制稱爲秦爲漢者蓋從初起之地名曰隋曰唐者又即始封之爵邑是皆徇百姓見聞之狃習要一時經制之權宜槩以至公得無少貶我太祖皇帝握

乾符而起朔土以神武而膺帝圖四振天聲大恢土宇輿圖之廣歷古所無頃者者宿詣庭奏章伸請謂旣成於大業宜早定於鴻名在古制以當然於朕心乎何有可建國號曰大元蓋取易經乾元之義茲大治流形於庶品孰名資始之功予一人底寧於萬邦尤切體仁之要事從因革道協天人於戲稱義而名故匪爲之溢美孚休惟永尚不負於投艱嘉與敷天共隆大號明太祖登極詔曰朕惟中國之君自宋運旣終天命真人於沙漠入中國爲天下主傳及子孫百有餘年今運亦終海內土疆豪傑分爭朕本准右庶民荷上天眷顧祖宗

之靈遂成逐鹿之秋致英賢左右凡兩淮兩浙江東江
西湖湘漢沔閩廣山東及西南諸部蠻夸各處寇攘屢
命大將軍與諸將校奮揚威武已皆戡定民安田里今
文武大臣百司衆庶合辭勸進尊朕爲皇帝以主黔黎
勉徇輿情即皇帝位於南郊定有天下之號曰大明以
是年爲洪武元年追尊四代考妣爲皇帝皇后建大社
大稷於京師立妃馬氏爲皇后長子標爲皇太子布告
天下咸使聞知 成祖登極詔曰昔我皇考太祖高皇
帝龍飛淮甸汛埽區宇東抵虞淵西踰崑崙南跨南交
北際瀚海仁風義聲震盪六合留爽闇昧咸際光明三

十年間九有寧謐煌煌功業恢於湯武德澤廣布至仁
彌流少主以幼冲之姿嗣守大業秉心不順崇信奸回
改更成憲戕害諸王放黜師保禍機四發將及於朕朕
爲高皇帝嫡子祖有明訓朝無正臣內有奸惡王得興
兵討之朕遵奉條章舉兵以清君側之惡蓋出於不得
已也使朕兵不舉天下亦將有聲罪而攻之者少主曾
不反躬自責肆行旅拒朕荷天地祖宗之靈戰勝攻克
擣之於塙上殲之於白溝破之於滄州潰之於藁城鏖
之於夾河輔之於靈璧六戰而已不國朕於是駐師畿
甸索其奸回庶幾周公輔成王之誼而乃不究朕懷闔

官自焚自絕於宗社朕整師入京秋毫無犯諸王大臣
謂朕太祖之嫡順天應人天位不可以久虛神器不可
以無主上章勸進朕拒之再三而不獲乃俯徇輿情即
皇帝位 洪熙登極詔曰朕惟上天生民爰立君主仁
育兆庶咸底於泰和統御華彝同躋於熙皞我先皇帝
奉天撫運治化高於百王文德武功聲教被於四海比
緣邊警虜龍馭以親征逮及凱旋竟鼎湖之升逝遺命
神器付予眇躬顧哀疚之方深豈遵承之遽忍親王公
侯駙馬伯文武臣僚君民耆老四夸朝貢之使俯伏闕
下奉表勸進以爲天位不可以久虛生民不可以無主

長嫡承統國家常經陳辭再三瀝懇勤切用是仰遵遺
命俯徇輿情祇告天地宗廟社稷即皇帝位奉祖考之
洪祐仰聖神之永圖屬茲莅祚之初宣布維新之命
敕梁沈約武帝踐阼後與諸州郡敕曰欽惟遠古爰
及近代雖禪代異時而成功一揆豈惟靜民寧亂實由
符運總集故能啓業垂統光宅區夏齊氏邁茲昏詖斯
亡奄及民命蠢蠢倒懸非喻朕大懼四海舟覆二象雲
傾億兆與崑岡並燎縉紳與蘊崇共日永言悽悼發憤
經營推鋒投袂電擊風掃藉上天之靈因熊羆之用德
未半古功侔前烈齊氏旣欽若虞夏高揖萬邦兼以冥

符先著樂推攸在幽顯宅心辭不獲命猥以虛寡君臨
萬國川壑之懷寤寐盈慮方欲昧且不顯日昃忘勞思
與賢能康濟世道卿擁旄萬里共治是寄當求民瘼留
念獄市威斷以御強猾仁惠以撫貧孤使遠近幽深咸
得其所方虛位欽能懸爵佇効勿令漢代璽書獨行於
自古晉世班條靡用於茲日想加克勉副其側席 **增**
唐張九齡處分朝集使敕曰朕恭已承天守文繼位布
一心於兆庶明四目於萬方恒恐道或未周物不遂性
旁求俊乂共理黎元於咨羣辟寧不我副凡今政要更
有四端衣食本於農桑禮樂興於學校流亡出於不足

爭訟由於無恥故先王務其三時將以厚生也脩其五
教將以惇俗也有國有家同知此義不患不知患在不
行耳必若縣得良宰萬戶息肩州有賢牧千里解帶仁
政不遙行之則是皆能勵節朕復何憂卿等還州遞相
勸勉遵此王度恤彼下人敬順天常無違月令夫星列
躔次土分區域休咎之徵惟人所感善必知生惡亦有
由每至歲成當加賞罰 **增**
令 **增** 晉元帝答劉琨等令曰方今岳牧伯之任股肱腹
心之臣萬邦之內九服之外咸見翼戴以隆天威是用
辭不獲已而居王位尋覽所陳弘旨優遠孤方當匡復

帝祚豈可猥居極位昔有夏克復賴靡艾之勳周宣中
興由申召之佐二公鎮御幽朔忠以衛上建功拯難寔
憑遠略夸難雪恥於是乎在 梁任昉齊宣德皇后臨
朝答梁王令曰承固茲謙抑未膺大典敬復雅旨良有
憮然夫至寂難原言象所絕教思有律感通斯在所以
異人者神明同人者用舍王誕茲上睿對越天行德冠
二儀化周羣動生民以來一人而已但達節弘道每濡
跡於中庸神照惟幾不抑心於鑽仰范宣既讓其下取
則况聖圖睿範歌思是歸廉約雖弘慶賞遂替誠賢者
悅義長難進之風不肖者矜功沮竭力之効勸沮之間

所差已遠王何得不暫紆雅尚允答天人使朕夜艾以
安早朝有預今遣率茲百辟申薦誠款萬致一塗煩言
可略 又敦勸梁王令曰夫功不在賞故庸勲之典蓋
闕施侔造物則謝德之塗已寡要不得不強爲之名使
銓宰有寄王實天生德齊聖廣淵重構參辰而九星仰
止不易日月而二儀貞觀在昔晦明隱鱗戢翼博通羣
籍而讓齒乎一考之師劍氣凌雲而屈跡於萬夫之下
辯析天口而似不能言文擅雕龍而成輒削毫爰在弱
冠首應弓旌客遊梁朝聲華藉甚隆昌季年勤王始著
建武惟新締構斯在功隆賞薄嘉庸莫疇一馬之田介

山之志愈厲六百之秩大樹之號斯存及擁旄司部代
馬不敢南牧推轂樊鄧胡塵罕嘗夕起惟彼狡童窮凶
極虐衣冠泯絕禮樂崩喪既而鞠旅誓衆言謀王室白
羽一麾黃鳥底定甲旣鱗下車亦瓦裂致天之屆拱揖
羣后豐功厚利無得而稱是以祥光總至休氣四塞五
老遊河飛星入昴元功茂勲若斯之盛而地狹乎四履
勢卑乎九伯帝有恩焉輶軒萃止今遣某等率茲百辟
人致其誠庶匪席之旨不遠而復 又重敦勸梁王令
曰朕聞匹夫好仁義在摩踵君子行道達斯兼濟未有
盡器窮神蘊徽章乎天植高奠中尊觀傾壘而弗拯惟

王德冠往初功無與二四時等契兩曜齊明擬度天行
取則乾健而運距艱季道極百王援義而起一戎大定
羅山革草罔不率從用使商庭產蒸周闕樹梓傾宮旣
散鹿臺靡蓄盛德大業巍巍若此日者事岐之號爰發
帝言殊物備禮率由寡昧雖復雲罕載路清蹕啓行昭
德報功未臻其極而高揖天休遠存克讓俾予未亡與
懸日昃今遣某等率茲百辟人致誠請庶有感睿心霈
然降志

賤 梁任昉爲百辟勸進梁王牋曰伏承嘉命佇策明
公逡巡盛禮斯寔謙尊之旨未窮遠大之致向者嗣君

洪鑑類考卷四十一
棄常自絕宗社國命民生翦為仇讐折棟崩榱壓焉自
及卿士懷脯斲之痛黔首懼比屋之誅明公亮格天之
功拯水火之切再踵日月重綴參辰反龜玉於塗泥濟
斯民於阮岸使夫匹婦兒童羞言伊呂鄉校里塾恥談
五霸位卑子阿衡地狹於曲阜明公宜祇奉天人允膺
大禮無使後予之歌同彼胥怨兼濟之仁翻為獨善
又牋曰近以朝命蘊崇冒奏丹誠奉披還令未蒙虛受
縉紳顛顛深所未達蓋聞受金於府通人之弘致高蹈
海隅匹夫之小節是以履乘石而周公不以為疑增玉
璜而太公不以為讓况世哲繼軌先德在民經綸草昧

歎深微管加以朱方之役荆河是依班師振旅大造王
室雖復累跡救宋重脰存楚居今觀古曾何足云而惑
甚盜鐘功疑不賞皇天后土不勝其酷是以玉馬駿奔
表微子之去金版出地告龍逢之怨明公據鞍輒哭厲
三軍之志獨居淹涕激義士之心故能使海若登祗罄
圖効祉山戎孤竹東馬景從伐罪弔民匡時靖亂匪叨
天功實勤濡足且明公本自諸生取樂名教道風素論
坐鎮雅俗不習孫吳構茲神武驅盡誅之氓濟必封之
俗龜玉不毀誰之功歟獨為君子將使伊周何地某等
不達通變寔有愚誠不任慙欵棘心重謁伏願特膺典

策式副民望

序增宋顏延之三月三日曲水詩序曰夫方策既載皇王之迹已殊鐘石畢陳舞詠之情不一雖淵流遂往詳略異聞然其宅天衷立民極莫不崇尚其道神明其位拓世貽統固萬葉而為量者也有宋函夏帝圖弘遠高祖以聖武定鼎規同造物皇上以叡文承歷景屬宸居隆周之卜既永宗漢之兆在焉正體毓德於少陽王宰宣哲於元輔晷緯昭應山瀆效靈五方雜運四隩來暨選賢建戚則擇之於茂典施命發號必酌之於故實大予協樂上庠肆教章程明密品式周備國容眊令而動

軍政象物而具箴闕記言校文講藝之官采遺於內轡車朱軒懷荒振遠之使論德於外賴莖素毳并柯共穗之瑞史不絕書棧山航海踰沙軼漠之貢府無虛月列燧千城通驛萬里穹居之君內首稟朔卉服之酋迴面受吏是以異人慕響俊民間出警蹕清夸表裏悅穆將徙縣中守張爍岱郊增類帝之壇飾禮神之館塗歌邑誦以望屬車之塵者久矣齊王融三月三日曲水詩序曰我大齊之握機創歷誕命建家接禮貳宮考庸太室幽明獻期雷風通響昭華之珍既徙延喜之玉攸歸革宋受天保生萬國度邑靜鹿丘之歎遷鼎息大坳之

法鏡卷四十一
六
慙紹清和於帝猷聯顯懿於王表駿發開其遠祥定爾
固其洪業皇帝體膺上聖運鍾下武冠五行之秀氣邁
三代之英風昭章雲漢暉麗日月牢籠天地彈壓山川
設神理以景俗敷文化以柔遠澤普汎而無私法含弘
而不殺猶且具明廢寢晷晷忘餐念負重於春冰懷御
奔於秋駕可謂巍巍弗與蕩蕩難名秉靈圖而非泰涉
孟門其何險用能免羣生於湯火納百姓於休和草萊
樂業守屏稱事引鏡皆明目臨池無洗耳沈冥之怨既
缺邁軸之疾已消興廉舉孝歲時於外府署行議年日
夕於中甸協律總章之司序倫正俗崇文成均之職道

德齊禮挈壺宣夜辨氣朔於靈臺書笏珥彤紀言事於
仙室褰帷斷裳危冠空履之吏影搖武猛扛鼎揭旗之
士勤恤民隱糾逃王慝射集隼於高墉繳大風於長隧
不仁者遠惟道斯行讒芳菝聞攘爭掩息稀鳴桴於砥
路鞠茂草於園扉耆年闕市井之游稚齒豐車馬之好
宮鄰昭泰荒憬清夸侮食來王左言入侍離身反踵之
君髻首貫胸之長屈膝厥角請受纓縻文鉞碧砮之琛
奇幹善芳之賦紉牛露犬之玩乘黃茲白之駟盈衍儲
邸充物郊虞甌牘相尋鞮譯無曠一尉候於西東合車
書於南北暢轂埋鞞麟之轍綏旌卷悠悠之旆四方無

拂五戎不距偃革辭軒銷金罷刃天瑞降地符升澤馬來
來器車出紫脫華朱英秀佞枝植曆草孽雲潤星暉風
揚月至江海呈象龜龍載文方握河沈璧封山紀石邁
三五而不追踐八九之遙跡功既成矣世既貞矣信可
以優游暇豫作樂崇德者與 梁陸倕石闕銘序曰昔
在舜格文祖禹至神宗周變商俗湯黜夏政雖革命殊
乎因襲揖讓異於干戈而晷緯冥合天人啓基克明峻
德大庇生民其揆一也在齊之季威侮五行怠棄三正
刑酷然炭暴踰膏柱民怨神怒衆叛親離躋地無歸瞻
烏靡託於是我皇帝拯之迺操斗極把鈞陳翼百神禔

萬福龍飛黑水虎步西河雷動風驅天行地止命旅致
屯雲之應登壇有降火之祥龜筮協從人祇響附穿胸
露頂之豪箕坐椎髻之長莫不援旗請奮執銳爭先夏
首憑固庸岷負阻協彼離心抗茲同德帝赫斯怒秣馬
訓兵嚴鼓未通凶渠泥首弘舸連舳巨艦接艦鐵馬千
羣朱旗萬里折簡而禽廬九傳檄以下湘羅兵不血刃
士無遺鏃樊鄧威懷巴黔底定於是流湯之黨握炭之
徒守似藩籬戰同枯朽革車近次師營商牧華夸士女
冠蓋相望扶老攜幼一旦雲集壺漿塞野簞食盈塗似
夏民之附成湯殷士之窺周武安老懷少伐罪弔民農

不遷業市無易賈八方入計四隩奉圖羽檄交馳軍書
狎至一日二日非止萬機而尊嚴之度不僭於師旅淵
默之容無改於行陣計如投水思若轉規策定帷幄謀
成几案曾未浹辰獨夫授首迺焚其綺席棄彼寶衣歸
璇臺之珠反諸侯之玉指麾而四海隆平下車而天下
大定拯茲塗炭救此橫流功均天地明並日月於是仰
協三靈俯從億兆受昭華之玉納龍敍之圖類帝裡宗
光有神器升中以祀羣望攝袂而朝諸夏布教都畿班
政方外謀協上策刑從中典南服緩耳西羈反舌劔騎
穹廬之國同川共穴之人莫不屈膝交臂厥角稽顙鑿

空萬里攘地干都幕南罷鄯河西無警於是治定功成
邇安遠肅忘茲鹿駭息此狼顧乃正六樂治五禮改章
程創法律置博士之職而著錄之生若雲開集雅之館
而款關之學如市興建庠序啓設郊丘一介之才必記
無文之典咸秩於是天下學士靡然向風識廉隅家
知禮讓教臻侍子化洽期門區宇又安方面靜息役休
務簡歲阜民和歷代規謨前王典故莫不芟夸翦截允
執厥中

梁沈約武帝集序曰文思安安欽明所以
光宅日月光華南風所以興詠日角之主出自諸生銳
頂之君少明古學漢高宋武雖闕章句歌大風以還沛

好清談於暮年夫成天地之大功膺樂推之寶運未或不文武兼資能事斯畢者也我皇誕縱自天生知在御清明內發疏通外典爰始貴遊篤志經術究淹中之雅旨盡曲臺之奧義莫不因流極源披條振藻若前疑往滯舊學穿通而超然直詣妙援終古善發談端精於持論置壘難踰摧鋒莫擬有同成誦無假含毫興絕節於高唱振清辭於蘭畹至於春風秋月送別望歸皇王高宴心期促賞莫不超挺睿興濬發神衷及登庸歷試辭翰繁蔚牋記風動表議雲飛雕蟲小藝無累大道懷君人之大德有事君之小心爲下奉上形於辭旨雖密奏

忠規遺橐必削而國謨藩政存者猶多逮乎俯應歸運仰脩乾錄載筆握簡各有司存如綸之旨時或染翰暨於設簾靈囿愷樂在鎬鹿鳴四牡皇華棠棣之歌伐木採薇出車杖杜之讌皆詠志擣藻廣命羣臣上與日月爭光下與鐘石比韻事同觀海義等窺天觀之而不測遊之而不知者矣竊惟左史記言右史記事君舉必書無論大小况乎感而後思思而後積積而後滿滿而後言若斯而已哉謹因事立名隨源編次

增唐太宗帝範序曰朕聞大德曰生大寶曰位辨其上下樹其君臣所以撫育黎元陶鈞庶類自非克明克哲允武允文皇

天眷命曆數在躬安可以濫握靈圖叨臨神器是以翠
媯薦陶唐之德元圭錫大禹之功丹羽呈祥周開七百
之祚素靈表瑞漢啓重華之基由此觀之帝王之業非
可以智競不可以力爭者矣昔隋季版蕩海內分崩先
皇以神武之姿當經綸之會斬靈蛇而定王業啓金鏡
而握天樞然猶五嶽含氣三光戢耀豺狼尚梗風塵未
定余以弱冠之年懷慷慨之志思靖太難以濟蒼生躬
擐甲冑親當矢石夕對以魚麗之陳朝臨以鶴翼之圍
敵無大而不可摧兵無堅而不可破翦長鯨而清四海掃
櫓而廓八紘既而承佑天潢澄清璇極襲重光之永業

繼寶錄之隆基戰戰兢兢若御深而馭朽日慎一日冀
善始而令終汝以幼年偏鍾慈愛未辨君臣之禮度不
知稼穡之艱難余每思此為憂未嘗不廢寢忘食今自
軒昊以降迄於周隋經天緯地之君纂業承基之主興
亡治亂其道煥然所以披鏡前蹤博採史籍聚其要言
以為近誠云爾 王勃九成宮頌序曰國家梯霄架極
罄域裁基纂高丘白雲之肩鬱函都紫氣之兆宸扉既
闢一宇宙而來王聖錄潛躋貳乾坤而作帝高祖天旗
夜立制黃鳥而九驅太宗日馭晨飛駮綠蟠而首出雖
立極承祧之業進燭前文而重光累洽之符歸功下武

陛下承靈太乙踵睿登三星虹沓社電剌發慶丹書碧
篆神符煥河洛之文玉斗珠衡天骨挺皇王之表用能
捨桐珪而瑄七營肅玉籍而揖宗祧寫靈九天騰景萬
里御風雷七曜於上博臨之功顯用山川六府於下輔
相之宜得元功密運敷造化於靈襟黃屋神凝創經綸
於寶思鳳幃宵靜陰靈宣玉闔之華鶴禁朝趨離象峻
銅樓之景川分帝子控鯤壑而疏源岳動天孫擁熊山
而列鎮其成化也如彼其強幹也如此猶乃停旒正室
嚴續中軒玉階匪泰金門爲險佇虹旃於月澗岳瀆生
光飛鶴槩於煙皋江湖動色桃溪逸彥塞丹井而歸風

松磴遺英斬元關而奉制位兼河海九卿參巨濟之功
道合星辰三事鬱經天之象朱轡緝化泣故老於中溪
墨綬宣風繞春童於上陌王化之基已洽天上之代有
序建銅儀而測曜象緯齊懸按璿璣而書雲禎氛疊舉
祥噦十二紫鸞調夏谷之音大禮三千賴蛇應黃鍾之
曲蠶功順令業著於青裳蜃磨迎春恩周於黛耜黃沙
靜讞爽鳩興頓足之悲丹石銷寃神解輟推鋒之計咏
時和於地壤動植咸驩歌道泰於華封昆蟲自樂星墟
列將輝玉節而長驅天策神兵下金壇而決勝橫麾赤
版蔥山成不戰之郊會繳青丘桃野見其亡之花煙馳

火激勵珠產而移琛雪驚冰洲駕瑤谿而納賈乾坤徑
復載遵赤縣之封曦望環周末出黃圖之域故夫含吐
萬物至功也制平八表大業也一陰一陽神道也乃文
乃武聖圖也用能使天不愛寶地不藏珍日月五行風
雲四序龍章鳳彩曷奕於郊墟黃鉉紫玉磊砢於垆囿
集風雲於翠簷浴甘露於朱英澤馬飛鑣山輿結轍殊
徽狎至祥書竭東郭之毫累譯同歸朝冊盡南山之竹
然後瑤壇備物陳帝服而展皇儀后室疇庸登泰山而
小天下功弘事畢狹廣宙而三遷風舉雲搖歷神都而
一憩考遺基於汶上稽故典於淹中光總章之瑞紀嗣

乾封之寶曆大矣哉昇中作睿握四海而為尊則大斯
模肇三宮而配永 明宋濂洪武聖政記序曰自古帝
王創業垂統方有事於征伐而於彌綸天下之治具勢
或未遑及其大統既集亦不過振厥宏綱而萬目未盡
舉焉如漢之高帝得國最正雖曰算無遺策而施之政
令猶乏精詳故史臣贊之亦但云規模宏遠而已夫以
高帝之雄傑尚如此則其餘從可知矣洪惟皇上以布
衣受天命蓋與高帝同雖當開拓土疆之際停戈講藝
息馬論道夜以繼日無一夕之寧迨正天位朝萬國孳
孳圖治恒若不足於是綱舉於上目備於下誠有非高

帝所可及是故郊廟以及百神之祭禮文咸秩則祀事
嚴矣御極之日即立儲位以正青宮則大本定矣眾建
諸王列封功臣則大分昭矣兵戎之眾自京師達於郡
府率皆設衛權一出於朝廷而為將者不得私而軍政
肅矣中外官有定制一革冗濫之弊而倖位絕矣冠服
有別防範有嚴而民志自定無僭侈矣他如申禁令覈
實效育人材優前代正禮儀之失去海嶽之封嚴宮壺
之法勵忠節之訓刷積歲之弊如斯之類不一而足或
前王所未得或行之有未至者皆煥然有條可以垂法
後世此其故何哉蓋自近代以來習俗圯壞殆將百年

而天生大有為之君首出庶物一新舊染之俗與民更
始是故睿思所斷動契典則度越千古咸無與讓此正
所謂錫智勇而正萬邦也臣備位詞林以文字為職業
親見盛德大業日新月著於是與僚屬謀取其有關政
要者編集成書名曰洪武聖政記然而天之高明也萬
物莫不覆焉地之博厚也萬物無不載焉聖人之作也
萬物咸興欣觀焉故凡金科之頒玉律之列著之於商
書刻之於琬琰傳之於聖子神孫者將與天地相為無
窮書曰惟天聰明惟聖時憲詩曰貽厥孫謀以燕翼子
此之謂也其所以致四海雍熙之洽比隆於唐虞三代

者豈不在於茲乎

啓原梁沈約賀齊明帝登阼啓曰竊惟皇源浚遠帝寶連暉基深慶厚道貫萬葉而鬱林凶德早樹行悖人經湫聽之所未書宗廟之殆如綴百靈聳動九服迴遑結后來之望思庇民之主日月以冀遐邇翹心伏惟陛下大聖在躬君德夙表龍章日采煥若麗天納麓賓門道風遐被睿化神行無思不洽獄訟允歸天人戴仰屈飛龍之眇轡紆汾陽之遠情運堯心以臨億兆敷舜烈以膺寶命雖中宗之興殷道宣后之隆漢德異世同符千載一揆刑措之業方遠隆平之基在焉率土含欣懷生

戴賴况臣早蒙覆潤夙荷恩靈踴躍外畿心不勝慶謹縉民和式流皇澤塗歌里抃載懷鳧藻

賦增漢班固東都賦曰往者王莽作逆漢祚中缺天人致誅六合相滅故下人號而上訴上帝懷而降監乃致命乎聖皇於是聖皇乃握乾符闡坤珍披皇圖稽帝文赫然發憤應若興雲霆擊昆陽憑怒雷震遂超大河跨北嶽立號高邑建都河洛紹百王之荒屯因造化之盪滌體元立制繼天而作系唐統接漢緒茂育羣生恢復疆宇勳兼乎在昔事勤乎三五豈特方軌並跡紛綸后辟治近古之所務蹈一聖之險易云爾哉且夫建武之

元天地革命四海之內更造夫婦肇有父子君臣初建人倫實始斯乃伏羲氏之所以基皇德也分州土立市朝作舟輿造器械斯乃軒轅氏之所以開帝功也龔行天罰應天順人斯乃湯武之所以昭王業也遷都改邑有殷宗中興之則焉即土之中有周成隆平之制焉不階尺土一人之柄同符乎高祖克已復禮以奉終始允恭乎孝文憲章稽古封岱勒成儀炳乎世宗案六經而校德眇古昔而論功仁聖之事既該而帝王之道備矣至於永平之際重熙而累洽盛三雍之上儀脩袞龍之法服鋪鴻藻信景鑠揚世廟正雅樂人神之和允洽羣

臣之序既肅乃動大輅遵皇衢省方巡狩躬覽萬國之有無考聲教之所被散皇明以燭幽然後增周舊修洛邑扇巍巍顯翼翼光漢京於諸夏總八方而為之極是以皇城之內宮室光明闕庭神麗奢不可踰儉不能侈於是薦三犧效五牲禮神祇懷百靈觀明堂臨辟雍揚緝熙宣皇風登靈臺考休徵俯仰乎乾坤參象乎聖躬目中夏而布德瞰四裔而抗稜西盪河源東澹海濬北動幽崖南耀朱垠殊方別區界絕而不鄰自孝武之所不征孝宣之所未臣莫不陸訶水慄奔走而來賓遂綏哀牢開永昌春王三朝會同漢京是日也天子受四海

之圖籍膺萬國之貢珍內撫諸夏外綏百蠻爾乃盛禮
興樂供帳置乎雲龍之庭陳百寮而贊羣后究皇儀而
展帝容於是庭實千品旨酒萬鍾列金罍班玉觴嘉珍
御太牢饗爾乃食舉雍徹太師奏樂陳金石布絲竹鐘
鼓鏗鎗管絃焯煜抗五聲極六律歌九功舞八佾韶武
備泰古畢四夸間奏德廣所及傑侏兜離罔不具集萬
樂備百禮暨皇歡浹羣臣醉降烟煴調元氣然後撞鐘
告罷百寮遂退於是皇上觀萬方之歡娛又沐浴於膏
澤懼其侈心之將萌而怠於東作也乃申舊章下明詔
命有司班憲度昭節儉示太素去後宮之麗飾損乘輿

之服御抑工商之淫業興農桑之盛務遂令海內棄末
而反本背僞而歸真女脩織紵男務耕耘器用陶匏服
尚素元恥纖靡而不服賤奇麗而弗珍捐金於山沈珠
於淵於是百姓滌瑕盪穢而鏡至清形神寂寞耳目不
營嗜欲之源滅廉恥之心生莫不優游而自得玉潤而
金聲是以四海之內學校如林庠序盈門獻酬交錯俎
豆莘莘下舞上歌蹈德詠仁登降飲宴之禮既畢因相
與嗟歎元德謹言弘說咸含和而吐氣頌曰盛哉乎斯
世 唐述聖賦闕撰人姓名曰臣聞立極著紀之初闢乾開
歷之始上所以分垂象曜下所以疆括地理惟大人之

有作越百代而孤峙飛五位以龍奮騰九萬而鵬越曩
者炎運將終鼎命去絕四溟波駭八維幅裂羽檄交馳
邊烽並爇長星夜埽車雲朝結莫不望壁壘以靡旗對
轅門而亂轍故得百城冰潰千里煙滅固靈命之有在
乃慷慨而投袂驅八駿以雷擊馭六飛而電逝騰星劍
以外倚振雲鋒而高彗既後事而先謀亦先勝而後制
兵有臨而必尅功無往而不濟龜策叶以符兆人神應
而合契諒包項以駕軒實孕皇而育帝足以光燭千祀
足以祚隆萬世於是戢兵偃武銘功紀勳採三代之逸
經刊八方之遺籍搜隱遁於林藪訪栖遲於巖石然後

調玉律以定時測金儀而考曆符洛下之前驗嗣容成
之絕迹若夫流惠澤於瀛表被仁風於區外窮八際以
來庭踰九譯而浹會莫不削衽而崇禮樂解辮而襲冠
帶參兩曜以齊明混二儀以稱大信一人之致感實萬
方之攸賴聖皇以令叶先甲時惟仲春乃整法駕馭華
輪六軍雷動萬乘星陳臨濁河以北睠指清洛而東巡
乃升雲闕俯天津朝萬國禮百神珍賚咸集要荒畢臻
夫其地也據三川以設險憑四闕而作固總奔湊於八
方測圭影於中度既定鼎於周業亦克昌於漢祚望高
巒之邈迤臨峻坂之迴互所以仰叶辰象所以俯清天

步於是凝聖情以遠慮思成敗於中古美揖讓於有虞
壯成功於大禹恥用兵於中冀鄙窮戰於丹浦每有違
於汝弼恒知失而思補乃命促苑囿散積聚改制度易
規矩削侈麗於樓臺崇質素於階宇仁好生而必遂德
無貫而不輔習嘉禮於玉帛和大樂於鐘鼓上可以降
集羣瑞下可以安懷率土惟聖作之可觀實萬物而斯
覩 顧况高祖受命造唐賦曰在桓靈之道曠兮本小
而未大下陵而上替君臣相失南北歷帝醜隋而命唐
纂周漢之鴻裔高皇生而豁達大度狗齊弱而能言神
光佳氣兮爛以氛氳兆白雀兮戴紫雲隱隱瞳瞳兮始

乎太原君子得時有如追奔岷峨遵江兮河出崑崙雷
砰電掣浩浩渾渾厥波雖雄爲海所吞乾健而坤順兮
利配乾而法坤有何姦豪恃險偷存乃建皇極鍾乎歷
數革舊鼎新兮式閭封墓走百神以咸秩兮包五嶽而
作固過蒲津而川后增流兮次霍邑而山靈告路彼尚
慘黷兮我寬刑以薄賦陋茅屋乎土階遵朱于與大輅
乃有嚴更之署環衛鈎陳文昌武庫玉冊韜府兮內八
景之真文金盤粲霞兮承九天之清露元聖有作恢法
度也厥祖草昧諸夏宗臣蠻夸酋長從德如歸若王固
讓而天下可違乎有社稷焉不可闕祀有烝人焉不可

無主是以木曰威仰火曰熯怒辰戌丑未王我唐土神
祇叶從龜筮攸同乃更正朔以刀文爲開通告於上下
予昧乃德嘉乃丕績若將殞於厥躬草艾渠魁兮罔駕
英雄拔萬姓於湯火兮散三光於昊穹此皇王所以職
教化也非天不應非聖不作造我鉅唐在夏之興弼成
九服經啓九道荒厥迹之茫茫在周之興西至流沙東
至樂浪重九譯乎越裳在漢之盛大夏身毒月支夜郎
辰韓之國盡革傍行未若我唐歌其聲舞其容十有二
部鏡立乎中央提封所經聲教所被窮天下之琛怪截
海外之梯航逾蟠桃而跨弱水兮蓋四十萬里鳥飛驥

驟兮鱗萃乎餘艗凝碧樹於洞房送白雲於帝鄉舞破
陣於清廟兮準文始與西廂迎氣於東郊兮養老於上
庠禘祫之禮鉅鬯圭瓚兮辟雍明堂襲蛟鱗之馥馥疊
鼉鼓之鏜鏜羽林孤兒青衿胄子森琳瑯以鏘鏘河山
巨防百二盤岡渭水貫都兮來天漢之湯湯浞龍宮而
捐鬼國延苑囿而峻墉隍驅駟騶犀象垂黃附驥之
馬骨騰肉飛滅沒陸梁鷲出女床鷓鷯白鷗孔雀翱翔
縮沙磧與江湘休徵四塞兮花萼連芳大容揮絃兮子
晉吹簧飛廉馳道兮河鼓服箱雍門韓娥流徵叩商徹
歌鐘於未央校羽獵於長楊 垂衣治天下賦

曰天曠唐帝恭承永命守無事為至德彰不言為大令當宁而百蠻自實垂衣而八極居正當書軌以混合系祖宗而作聖治契無外人羞有為戴北極以定位比南山而不移皇皇焉儼六服以御萬燭燭焉虛四聰而聽卑備其文火龍迴帶以如動藏乎用天地成功而不知與區夏再造俾古今同道靜以虛襟固其大寶儲精而雲鬱冠蓋恭已而耀生黼藻故能追軒皇躡陶唐文物周衛邦家有光颯祥雲乎五彩蟠瑞靄於六章豈徒具飾乎領袖亦以權量乎圓方是知垂拱者古之難委裘者聖之旨蓋與神合寧將智使不然何以酌天心安地

紀一家之大無煩車馬以巡遊九重雖深盡見山川之疆理形神不拘清淨為徒體安以一襲道洽於三無俟時不在於顛倒致美何傷乎曳婁於時天淨泰階城開外戶應星精以列將動岳神而生輔楚製者分闡而守封縫掖者坐帷而論古續未周而如挾袞有闕而咸補宋呂大鈞天下為一家賦曰古之所謂天下為一家者盡日月所照以度地極舟車所至以畫疆以八荒之際為藩衛以九州之限為垣墻列國則羣子之舍王畿則主人之堂凡民之賢而不可遠者皆我之父兄保傅愚而不可棄者皆我之幼稚獲臧經理其財乃上所以

養下之道分責之事乃下所以事上之常買遷有無而不知彼我之實損益上下而不辨公私之藏大矣哉外無異人旁無四鄰無寇賊可禦無閭里可親一人之生喜如似續之慶一人之死哀若功總之倫一人作非不可不媿亦我族之醜一人失所不可不閔亦吾家之貧尊賢下不肖則父教之義嘉善矜不能則母鞠之仁朝覲會同則幼者之定省承稟巡守聘問則長者之教督撫存曲防過羅以幸其災縱諜用間以乘其失乖睽有甚於閱牆鬪狼不離於同室迨至秦政以強自吞推所不愛以殘自昏斧斤親刃其九族塗炭自隳其一門興

阡陌而廢井田則委貨財於盜賊之手置郡縣而罷封建則託婦子於羈旅之屯貧富不均幾臣僕其昆弟苟簡不省皆土苴其子孫自漢以來終亦不復雖有王侯而不得輒預其政雖有守令而不得久安其祿譬之錦衣玉食縱無所用之子雕車良馬委不善御之僕門庭雖存亦何足以統制閭門無法則何緣而雍睦豪強日橫而略無鞭撻之制單弱日困而不識襁褓之鞠豈天理之固然實人謀之不足 司馬光交趾獻奇獸賦曰皇帝御天下三十有六載化洽於人德通於神邇無不協遠無不臻粵有交趾來獻麒麟於是羣公卿士百僚

庶尹儼然垂紳薦笏旅進而稱曰陛下功冠邃古化侔
儀極共承神祇嚴奉宗稷純孝烝烝小心翼翼出入起
居不忘於訓典進退周旋必咨於軌則體文王之卑服
遵大禹之菲食宮室觀臺無巖刻之華輿馬器用無珠
玉之飾遊必備於法駕燕不廢於朝夕此皆帝王所不
能爲陛下行之尚不忘於怵惕是以方內乂寧黎民滋
殖垂髫之童耳皆習於詩禮戴白之叟目不睹夫金革
至於根著浮流跂行喙息無不翔舞太和涵濡茂澤此
殊俗所以響臻靈獸所以來格雖漢室之初黑鸛貢於
絕徼周家之隆白雉通於重譯殆不足方也臣等謂宜

命協律播之聲歌詔太史編之簡策以發揮不世之洪
休張大無倫之不績不亦偉乎皇帝乃穆然深思愀然
不怡曰吾聞古聖人之治天下也正心以爲本脩身以
爲基閭門睦而四海率服朝衆和而羣生悅隨故務其
近不務其遠急其大不急其微今邦雖康未能復漢唐
之宇俗雖阜未能追堯舜之時况物尚疵癘而民猶怨
咨朕何敢以未治而忘亂未安而忘危享四方之獻當
三靈之釐皇帝於是御棧樸之篇觀大畜之繇延黃髮
之儒顯巖穴之秀善有可旌無間於幽遠言有可采不
棄於微陋位匪德而不升官無能而不授使稷契居左

皋夔立右伊呂在前周召侍後相與講經藝之淵原覽
皇王之步驟求大化之所未孚訪惠澤之所未究興民
之利若療夫饑渴除民之害若憂夫疾疢賜予簡而功
無所遺刑罰清而姦無所漏浮費省而物不屈於求須
苛役蠲而農不妨於耘耨使之夏有葛而冬有裘居有
倉而行有糗絲續之饒足以養其老甘脆之餘足以慈
其幼地不加廣而百姓足賦不加多而縣官富道塗之
人恥爭而喜讓閭閻之俗棄漓而歸厚戶知禮義之方
人享期頤之壽然後旃裘之長頓顙而警服祝髮之渠
回面而奔走靡不投利兵而襲冠帶焚僭服而請印綬

於是三光澄清萬靈敷佑風雨時若百稼豐茂休氣充
塞殊祥輻輳甘露霰霖於林薄醴泉感沸於嵌竇華平
羅植於階祀朱草叢生於庭雷鳳凰長離駢枝而結巢
黃龍騶虞羣友而爲畜

詩增唐太宗幸武功慶善宮詩曰壽丘唯舊跡豐邑乃
前基粵子承累聖縣弧亦在茲弱齡逢運改提劍鬱匡
時指麾八荒定懷柔萬國夸梯山咸入款駕海亦來思
單于陪武帳日逐衛文螭端宸朝四嶽無爲任百司霜
節明秋景輕冰結水湄芸黃遍原隰禾穎積京坻共樂
還鄉宴歡此大風詩 又執契靜三邊詩曰執契靜三

邊持衡臨萬姓玉彩輝關燭金華流日鏡無爲宇宙清
有美璇璣正皎佩星連景飄衣雲結慶戢戈榮十德昇
文輝九功煙波澄舊碧塵火息前紅霜野韜蓮劔關城
罷月弓錢綴榆天合新城柳塞空花消蔥嶺雪穀盡流
沙霧秋駕轉兢懷春冰彌軫慮書絕龍庭羽烽休鳳穴
戍衣宵寢二難食盱飡三懼翦暴興先廢除凶存昔亡
圓蓋歸天壤方輿入地荒乳海池京邑雙河沼帝鄉躬
脩思勵已撫俗媿時康元首佇鹽梅股肱唯輔弼羽賢
控嶺四翼聖襄城七澆俗庶反淳替文聊就質已知隆
至道共歡區宇一 許敬宗奉和執契靜三邊詩曰元

塞隔陰戎朱光分昧谷地遊窮北際雲崖盡西陸星次
絕軒臺風衢乖禹服寰區無所外天覆今咸育竄苗猶
有孽戮負自貽辜網疎妖鮪漏盤藪怪禽逋鬣飛尚假
息乳視暫稽誅乾靈振玉弩神略運璇樞日扇廓遊氛
天陳清華野昇暄光西夜馳恩溢東瀉揮袂盡崑炎開
關納流赭錦輶凌右地華纓羈大夏清臺映羅葉元祉
控瑤池駮鹿輸珍貺樹羽響來儀輟鑄觀化雨栖籟萃
條支薰風交閭闕就日泛濛漪充庭延飲至絢簡敷春
藻迎姜已創圖命力方論道昔託遊河乘再備商山皓
欣逢德化流思效登封草 蘇味道奉和受圖溫洛詩

日綠綺膺河檢青壇俯洛濱天旋俄制蹕孝享屬嚴禋
陟配光三祖懷柔泊百神霧開中道日雪斂屬車塵預
奉咸英奏長歌億萬春 牛鳳及奉和受圖溫洛詩曰
八神承玉輦六羽警瑤溪戒道伊川北通津澗水西御
圖開洛匱刻石與天齊瑞日波中上仙禽霧裏低微臣
矯弱翮抃舞接鸞鷲 陳子昂皇帝上禮撫事述懷詩
曰大君忘自我應運居紫宸揖讓期明辟謳歌且順人
軒宮帝圖盛皇極禮容申南面朝萬國東堂會百神雲
陛旗常滿天庭玉帛陳鐘石和睿思雷雨被深仁承平
信娛樂王業本艱辛願罷瑤池宴來觀農扈春卑宮昭

夏德尊老睦堯親微臣敢拜手歌舞頌惟新 李嶠皇
帝上禮撫事述懷詩曰配極輝光遠承天顧託隆負圖
濟多難脫履歸成功聖道昭永錫邕言讓在躬還推萬
方重咸仰四門聰恭已忘自逸因人體至公垂旒滄海
晏解網法星空雲散天五色春來日再中稱觴合纓弁
率舞應絲桐凱樂深居鎬傳歌盛飲豐小臣濫簪筆無
以頌唐風 又奉和拜洛應制詩曰七萃鸞輿動千年
瑞檢開文如龜負出圖似鳳銜來殷薦三神享明禋萬
國陪周旗黃鳥集漢幄紫雲迴日暮鈎陳轉清歌上帝
臺 盧綸皇帝聖感詞四首曰提劔雲雷動垂衣日月

明禁花呈瑞色國老見星精發棹魚先躍窺巢鳥不驚
山呼一萬歲直入九重城 天衣五鳳彩御馬六龍文
雨露清馳道風雷翊上軍高旌花外轉行漏樂前聞時
見金鞭舉空中指瑞雲 妙算干戈止神謀宇宙清兩
階文物盛七德武功成校獵長楊苑屯軍細柳營歸來
獻明主歌舞溢春城 天樂下天中雲屏儼在空鉛黃
豔河漢笑語合笙簧已見長隨鳳仍聞不射熊君王親
試舞閭闔靜無風 楊巨源春日奉獻皇壽無疆詞十
首曰文物京華盛謳謠國步康瑤池供壽酒銀漢灑宸
章靈雨含雙闕雷霆肅萬方代推仙祚遠春共聖恩長

鳳宸臨花暖龍鑪旁日香遙知千萬歲天意奉君王
鴛鴦彤庭際軒車綺陌前九城多好樂萬井半祥煙人
醉逢堯酒鶯啼答舜絃花明御溝水香暖禁城天賜宴
文逾盛徵歡物更妍無窮豔陽月長奉太平年 雲陛
臨黃道天門在碧虛大明含睿藻元氣抱宸居戈偃征
苗後詩傳宴鎬初年華富仙苑時哲滿公車化入網緼
大恩垂渙汗餘悠然萬方靜風俗揖華胥 玉漏飄青
璫金鋪麗紫宸雲山九門曙天地一家春瑞靄方呈賞
暗風本配仁巖廊開鳳翼水殿壓螯身文雅逢明主歡
娛及賤臣年年未央闕恩共物華新 垂拱坤正歡

心品類同紫煙含北極元澤付東風珠綴留晴景金莖
直曉空發生資盛德交泰讓全功間氣登三事祥光啓
四聰遐荒似川水天外一朝宗代是文明晝春當宴
喜時鑪煙添柳重宮漏出花遲漢典方寬律周官正探
詩碧霄傳鳳吹紅旭在龍旗造化膺神契陽和沃聖思
無因隨百獸率舞春丹墀睿德符元化芳情翊太和
日輪皇鑒遠天仗聖朝多曙色合金榜晴光轉玉珂中
宮陳廣樂元老進廢歌蓮葉看龜上桐花識鳳過小臣
空擊壤滄海是恩波物象朝高殿簪裾溢上京春當
九衢好天向萬方明樂報簫韶發杯看沆瀣生芙蓉丹

闕暖楊柳玉樓晴閣闔開中禁衣裳儼太清南山同聖
壽長對鳳凰城日上蒼龍闕香含紫禁林晴光五雲
疊春色九重深賞叶元和德文垂雅頌音景雲隨御輦
顯氣在宸襟永保無疆壽長懷不戰心聖朝多慶賜瓊
樹粉墻陰化洽生成遂功宣動植知瑞凝三秀草春
入萬年枝鳳掖嘉言進駕行佳氣隨仗臨丹地近衣對
碧山垂渥澤方柔遠聰明本聽卑願同東觀士長對漢
成儀杜甫行次昭陵詩曰舊俗疲庸主羣雄問獨夫
識歸龍鳳質威定虎狼都天屬尊堯典神功協禹謨風
雲隨絕足日月繼高衢文物多師古朝廷半老儒直詞

寧我辱賢路不崎嶇往者災猶降蒼生喘未蘇指揮安
率土盪滌撫洪鑪壯士悲陵邑幽人拜鼎湖玉衣晨自
舉鐵馬汗常趨松柏瞻虛殿塵沙立暝途寂寥開國日
流恨滿山隅 又重經昭陵詩曰草昧英雄起謳歌曆
數歸風塵三尺劔社稷一戎衣翼亮貞文德丕承戢武
威聖圖天廣大宗祀日光輝陵寢盤空曲熊羆守翠微
再窺松柏路還見五雲飛 薛逢宣政殿前陪位觀冊
憲宗皇帝尊號詩曰樓頭鐘鼓遞相催曙色當衙曉仗
開孔雀扇分香案出袞龍衣動寶函來金泥照耀傳中
旨玉節從容引上台盛禮永尊徽號畢聖慈南面不勝

哀 陳陶皇帝擊壤歌詩曰百六承堯緒艱難土運昌
太虛橫慧宇中野鬪豺狼帝曰更吾嗣時哉憶聖唐英
星垂將校神嶽誕忠良鍊石醫元氣屠鼈正昊蒼埽原
鋪一德驅侵立三光大道重蘇息真風再發揚芟夸踰
舊跡神聖掩前王郊酒酣寥廓鴻恩受渺茫地圖龜負
出天誥鳳銜將雜貢來山峙羣夸入雁行紫泥搜海岱
鴻筆富巖廊鷹象敷宸極寰瀛作瑞坊泥丸封八表金
鏡照中央構殿符麟趾開藩表鳳翔鸞輿親稼穡朱幌
務蠶桑戎羯輸天馬靈仙侍玉房宮儀水蒐甲門衛綠
沈槍陶鑄超三古車書混萬方時巡望虞舜蒐狩法殷

湯化合謠謠滿年豐鬼蜮藏政源歸牧馬公法付神羊
寶鼎無靈應金甌宵破傷封山昭茂績祠法答嘉祥在
昔宮闈僭仍羅昇泥殃牝鷄何詼譎猗犬漫動勦苗禱
三靈怒桓偷九族亡鯨鯢尋挂網魑魅旋投荒松柏霜
逾翠芝蘭露更香聖謨流祚遠仙系發源長島嶼征徭
薄漪瀾汎稻涼鳧魚饜餐啖荷薛足衣裳寤寐華胥國
嬉遊太素鄉鷹鷂飛接翼忠孝住連墻有叟能調鼎無
媒隱釣璜乾坤資識量江海入文章野鶴思蓬闕山麋
憶廟堂泥沙空淬礪星斗屢低昂歷草何因見衢樽豈
暫忘終隨嘉橘賦霄漢謁義皇李百藥謁漢廟詩曰

纂堯靈命啓滅楚閏餘終飛名膺帝籙汎迹韞神功瑞
氣朝浮碣祥符夜告豐抑揚駕人傑咤叱掩時雄締構
三靈改經綸五緯同于戈革宇內聲教盡寰中運謝年
逾遠魂歸道未窮樹碑留故邑抗殿表祠宮沐蘭祈泗
上謁帝動深衷英威宿如在文物杳成空竹皮聚寒徑
粉社落霜叢蕭索陰雲晚長川起大風劉希夷謁漢
世祖廟詩曰春陵氣初發漸臺首未傳列營百萬衆持
國十八年運開朱旗後道合赤符先宛城劔鳴匣昆陽
鏑應弦獲獸血塗地巨人聲沸天長驅過北趙短兵出
南燕太守迎門外王郎死道邊昇壇九成陌端拱千秋

田朝廷方雀躍劍佩幾聯翩至德刑四海神儀翳九泉
宗子行舊邑恭聞清廟篇君容穆而聖臣像儼猶賢攢
木承危柱疎蘿挂朽椽祠庭巢鳥啄祭器網蟲緣懷古
江山在惟新曆數遷空餘今夜月常似舊時懸 宋尹
洙皇雅十首曰天監下民亂靡有定甚武且仁祚厥真
聖仁實懷徠武以執競匪虔匪劉拯我大命自昔外禪
月經日營令以挾制政以陰傾帝初治兵志勤於征奄
受神器匪謀而成淮潞弗虔卒汚叛迹戎輅戒嚴皇威
有赫彼寇註民吾勇其百殄厥渠魁貸其反側帝朝法
宮左右宗公伎夫悍士以雍以容爾居爾室爾工爾農

既息既養惟天子功 主用西師岷梁弗賓匪曰負固
實交晉人予訓予誓合我將臣正厥有罪無庸傷民矯
矯虎士載摧其壁吁嗟孟侯亦果其策迎師而降靡抗
鋒鏑豈獨身謀完是宗國蜀都既平將臣失律此衆悍
驕彼民危慄當塗叫喚合萬爲一匪懷則威帝心是恤
帝曰將臣予嘉乃庸廢命毒民爾弗有終邦典用疑惟
罪惟功靡殛而削協於厥中帝曰孟侯受封於楚淑旂
瑠戈備物異數俾爾族姻及乃文武服乃王庭靡不有
序蜀民歌呼天子威靈保我者封暴我者刑匪功是和
匪弱是陵天子惠民誰敢不承 者武定功時惟二方

淮服其義南海遂荒孰辱而盪孰暴而猖自底不諱乃
終滅亡帝戒二倖同即爾誅惟民無辜休息是圖時其
輯矣寧威獨夫帝嗟汙邦久罹於兵或暴下以征或敷
虐以刑予命中典協於國經民服德音室家以寧帝
懷永圖治古是憲四方守臣惟屏惟翰在昔艱難弗惠
訓典跨都連城高牙以建有土有民肆乃征繕以息以
容終焉叛換凡今帥臣徂歟聞是匪革亂原曷清多難
帝告庶邦式是典彝元侯顯父威臣宗支正乃封圻予
一人是毗凡曰附城罔爾俾之畜兵厚賦靡爾得私毋
凶而國作福作威天子有命疇敢不祗子孫承承唯萬

世規 冀州之疆粵惟大鹵俗伎而專地扼而固協比
幽都蕩搖邊圉二垂旣夸兇威弗沮帝御六師百萬貔
虎翦其附庸至於城下鋒鏑始交梯衝如舞蠢爾辱王
請附降虜我士奮揚願究吾武皇帝曰吁念彼黎庶匪
鯨匪鯢復爲王士晉郊旣平九區以寧陳功太廟告假
威靈在昔武王於商觀兵惟我藝祖亦勤於征匪貸晉
罪侯作貫盈聖作聖繼巍巍相承皇矣二后功莫與京
帝籍於郊典儀具陳務農以訓供祀以勤祀在於誠
匪勤於人訓農以實匪訓以文帝謹二物乃躬乃親公
侯卿士暨庶民千甸有制飭哉惟寅帝賚高年式宴

且喜種種黃髮族丘而議我生艱難暴亂以繼耳徃金
鼓目狎戎器皇其我圖新講農事有子有孫力田孝悌
鼓舞至仁薰焉如醉 帝咨庶工疇其輔子俊又以登
厥勞乃圖匪忘舊勲匪賢勿俞巍巍衮台盛德以居任
賢伊何昌言是庸勉告爾猷罔恤迺躬豈無猥辭悌逆
於衷予不爾疵爾無面從始時從官戎容揚揚今帝左
右儒冠煌煌朝廷以尊文物典章得人之盛奕世重光
帝制萬邦罔有弗賓蠻夸戎狄羈而勿臣威格三方
稽顙獻珍單于革心願交使人帝謀公卿列侯庶校咸
曰彼心暴戾陰狡既擾我疆復利吾寶無若勵兵襲其

還道皇曰有衆予實念茲戰無必勝矧其歸師借曰大
獲疇能盡之益俾餘醜毒無朔陲乃俞其盟北州以綏
在漢世宗抗威北戎暴農算商經用弗充中土震騷漢
南始空降及後世猶稱厥功初穆聖考德無與偕匪勤
於兵北人遂來逮是三紀遠俗以懷生民休息嗚呼仁
哉 帝仁於明刑在位者以寬恤爲治焉皇底其治欽
哉惟刑在疑而宥罔察爲明愛怒弗肆孰爲重輕毋一
弗辜惟典之平前世理官倚法以刻匪彼爲仇蓋曰任
職令之蔽獄務正其辟鑒於前人繫我仁德皇德在仁
寢而成風公侯卿士靡不率從膺卯萌生成保厥終不

鄙不天樂哉融融 噫太平無象今世烏得而知維盛
德可迹兮其封祀之儀東岱宗兮西汾睢禮上帝兮賓
地祇皇有征兮吾民以嬉皇有祈兮吾民是私天敷佑
兮惟皇之釐永世億寧兮無疆之基 范仲淹堯廟詩
曰千古如天日巍巍與善功禹終平洛水舜亦致薰風
江海生靈外乾坤揖讓中鄉人不知此簫鼓謝年豐
黃庭堅神宗皇帝詩曰文思昭日月神武用雷霆制作
深垂統憂勤減夢齡孫謀開二聖永命對三靈今代誰
班馬能書汗簡青 鈞築收賢輔天人與聖能輝光唐
六典度越漢中興百世神宗廟千秋永裕陵帝鄉無馬

跡空望白雲乘 邵雍觀盛化詩曰紛紛五代亂離間
一旦雲開復見天草木百年新雨露車書萬里舊山川
尋常巷陌猶簪紱取次園林亦管絃人老太平春未老
鶯花無害日高眠 元郝經開平新宮詩曰日月旋天
蓋星辰合斗樞光騰掌內鐵氣繞澤中蒲金帛羞重賜
弓刀奮一呼真人翔灞上天馬出余吾尺箒初開闢羣
雄競走趨無勞爲更舉乘勝即長驅蹴蹋千年雪驍騰
萬里駒長城衝忽斷弱水飲先枯肅殺威靈盛驅除運
會俱華夸塵頽洞天地血糝糊地盡諸蕃外兵窮兩海
隅九州皆瓦礫萬國一榛蕪誰與重休息徒爲妄駭吁

治平須化日殺伐豈良圖聖子曾當璧神孫會握符鐵
山深蘊玉瀚海特生珠曆數終當在謳歌信不誣欲成
仁義俗先定帝王都畿甸臨中國河山擁奧區燕雲雄
地勢遼碣壯天衢峻嶺蟠沙磧重門限扼狐侵淫冠帶
近參錯土風殊翠擁和龍柳黃飛盛樂榆岐山鳴鸞鷲
冀野牧駒駝風入松杉勁霜涵水草腴穹廬罷遷徙甌
脫省勤劬階土遵堯典卑宮協禹謨既能避風雨何用
飾金朱棟宇雄新造城隍屹力扶建瓴增壯觀定鼎見
規模五讓登皇極羣生賜大酺還聞却走馬即見弛威
孤簡策詢前代弓旌聘老儒恢弘回一氣徼幸絕多途

雷雨施龐澤乾坤洗舊汙直為提赤子遂使出洪鑪遠
徼收疲繭窮邊罷轉輸江壖遺鄂岳石窟棄巴渝刀槊
存殘骨膏粱換毒痛却令逢有道免使叫無辜契闊還
同室鯁惇得字孤八荒皆壽域六合極歡娛白叟休垂
泣蒼生獲再蘇只知期用夏更擬論平吳旭日冰天透
仁君雪國無終能到周漢亦足致唐虞遇主得知已逢
時合舍軀弭兵通信誓奉詔敢踟躕頓覺心田豁還將
肝紙劄行行重回首瑞氣滿闔閭 明宣宗章皇帝述
祖德詩曰恭惟我仁祖躬備大聖德天性稟純粹溫恭
而允塞篤志在仁義兼亦貴稼穡寶玉之所藏山川被

光澤 維時屬邁屯畎畝之自適進退與道俱玉德懷
貞白皇天鑒昭晰寶命所繇錫篤生太祖聖配天立人
極 海內如鼎沸土壤分割折蒼生靡怙恃俛伏斃毒
螫仗劍起濠梁奉天拯焚溺再駕定東南一舉下西北
曠哉六合內腥穢悉盪滌三光復宣朗五典重脩飭
遠齊堯舜功近過湯武績遂令普天下休養樂生息
太宗削奸回維統奠宗祏聖文既炳煥神武尤赫奕賢
才盡登用秉德各脩職庶邦承覆載貢獻來九譯 昭
考撫盈成至仁弘隱惻民安視如傷恭已臨萬國繼志
與述事夙夜懷兢惕皇風益清穆皇道彌正直 正本

所自隆仁祖實啓迪祥源深且廣天派肆洋溢聖神紹
傳序茂衍萬世曆造商本元王興周美后稷 茲予嗣
鴻業時幾謹申飭四聖赫在天悠久貽法式保佑賴深
眷負荷媿餘力稽首陳咏歌庶用示無斁 劉基聖人
出詩曰聖人出臨萬方赤若白日登扶桑陰靈韜精星
滅芒羣氛辟易歸大荒曖曖寒谷熙春陽枯根發茁暢
幽藏潛魚躍波谷鳥翔花明草暖青天長聖人壽北斗
軒轅調氣候北辰居中環列宿八方應律九歌奏圓方
交格神靈輳聖人出陽道開億萬年歌康哉 又謁夏
王廟有感詩曰一片宮垣粉牘新前王陵廟在松筠玉

書金簡歸天地貝葉曇花詫鬼神滄海波濤紆職貢山
川草木望時巡苗頑未狎虞階舞空使忠良淚滿巾
李東陽孝宗皇帝詩曰恭已同虞帝祇台比夏王內廷
無女謁外圍絕禽荒富有天和養終期曆數長彼蒼何
弗弔民物共摧傷 聖道通三極王言似六經面開天
日表書作虎龍形祀國憂方劇華胥夢不醒萬年金匱
在遺訓炳丹青 鶴髮承顏日龍樓問寢晨兩宮同奉
養九廟極精禋孝可通金石誠能動鬼神徽稱高萬代
垂憲及千春 猷畝蒼生念閭閻白屋情覽章時晷日
露禱必深更歲旱憂疑獄天寒憫戍兵尚遺寬卹詔朝

野共吞聲 極意窮幽隱虛懷仰治平近臣常造膝閣
老不呼名道合君臣義恩深父子情化機元不偶天意
竟何成 玉几終宵坐彤闈徹曉通孫謀思祖訓家教
託儲宮天語丁寧際龍顏髣像中此身真隔世地下儻
相從 海宇熙平日乾坤夢幻間虹流始華渚龍臥已
橋山堯英驚新換湘筠憶舊斑翠華天上去無路可追
攀 靈駕歸何處茂陵西更西日輪埋地軸雲路隔天
梯月迴鳴鑿靜山圍簇仗齊元宮松柏裏瞻望轉淒迷
又重謁孝陵有述詩曰龍虎諸山會車書萬國同星
躔環斗極王氣繞江東地湧神宮出橋分御水通丹爐

晨隱霧石馬夜嘶風日月無私照乾坤仰聖功十年瞻
望地雲樹鬱蔥蔥 又孝宗皇帝輓歌曰北闕南都象
鑄豐我皇身自際時雍祇因龍種如高帝何止虬髯似
太宗草木有情皆長養乾坤無地不包容因思二十年
前事長躡仙班待九重 聖朝偃武脩文日共道王言
似六經宋史重施新袞鉞孔庭增飾舊邊劔垂衣共仰
升龍象賜墨皆成翥鳳形回首茂陵松柏樹春來還向
裕陵青 薛蕙候聖駕回詩曰西北收皇旅東南歸帝
京山驅八駿下海汎六龍行後車環外衛前駟集神垆
支兵連四校中堅屯九營絳氣曳朱竿青雲生翠旌饒

歌彩吹激行漏玉鸞鳴入覲萬國至清宮羣后迎金貂
雜流景圭璧委繁星錄功對五帝合符朝百靈俯窺地
紐正仰瞻天柱平郊裡方展義升封將告成祈招美王
度長謠誦休明

淵鑑類函卷四十六

淵鑑類函卷四十七

帝王部八 符命

符命一

原春秋潛潭巴曰里社鳴此里有聖人其响則百姓歸之
 春秋孔演圖曰天子皆五帝之精寶各有題序以
 次運相據起必有神靈符紀使開階立遂河圖挺佐
 輔曰黃帝修德立義天下大治乃召天老而問焉余夢
 見兩龍挺白圖以授余於河之都天老曰河出龍圖雒
 出龜書紀帝錄列聖人之姓號興謀治太平然後鳳皇
 處之今鳳皇以下三百六十日矣天其受帝圖乎黃帝

帝王部

淵鑑類函卷四十七

符命

乃被齋七日至於翠嬀之川大鱸魚折溜而至乃與天
老迎之五色畢具魚汎白圖蘭葉朱文以授黃帝名曰
錄圖 尚書中候曰帝堯即政榮光出河休氣四塞龍
馬銜甲赤文綠字甲似龜背五色有列星之分斗政之
度帝王紀錄興亡之數 **增**又曰朕率羣臣沈辭於洛
河俟於下稷赤光起元龜負書出赤文綠字 帝王世
紀曰堯佐帝摯受封於唐年二十而登帝位以火承木
景星曜於天甘露降於地朱草生於郊鳳皇止於庭
宋志曰堯在位七十年將以天下禪舜乃潔齋修壇於
河雒率舜等升首山遵河渚有五老游焉蓋五星之精

也相謂曰河圖將來告帝以期知我考重瞳黃姚視五
老飛為流星上入昴 **原**雜書靈準聽曰舜受終鳳皇
儀黃龍感朱草生莫莢葦西王母授益地圖 西王母得
益地之圖
以 干寶搜神記虞舜耕於歷山得玉曆於河際之巖
舜知天命在己體道不倦 **增**宋志曰夏道將興青龍
止於郊祝融降於崇山 **原**帝王世紀禹父既放降在
匹庶有聖德夢日洗於河西四岳師舉之舜進之堯
尚書璇璣鈴曰禹開龍門導積石元圭出刻曰延喜玉
受德天賜佩 **增**河圖曰禹治水功大天帝以寶文大
字賜禹佩之以渡北海弱水之灘 洪範曰天錫禹洪

帝王部
符命

范九疇彝倫攸敘 **原**尚書中候曰臣觀河伯面長人首魚身出水曰吾河精也授臣河圖 **隋**巢子曰昔三苗大亂天命夏惠於元宮有大神人面鳥身降而福之司祿益富而國家實司命益年而民不夭四方歸之禹乃克三苗而神民不違 **墨**子曰夏桀時天乃命湯於騶宮有神來告曰夏德大亂往攻之予必使汝大戡之尚書中候曰天乙在亳諸鄰國襁負歸德東觀乎雒降三分譬黃魚雙躍出濟於增化為黑玉赤勒曰元精天乙受神福伐桀克 **春秋**元命苞曰殷紂之時五星聚於房房者蒼神之精周據而興 **禮**竹書曰初黃帝

之世讖言曰西伯為王期在甲子昌制命發行誅旦行道及公劉之後十三世而生季歷季歷三十年飛龍盈於殷之牧野此蓋聖人在下位將起之符也子昌為西伯作邑於豐文王之妃曰太姒夢商庭生棘太子發植梓樹於闕間化為松柏棫柞以告文王文王幣率羣臣與發並拜告夢季秋之甲子赤爵銜書及豐置於昌戶昌拜稽首受其文要曰姬昌蒼帝子亡殷者紂 **又按尚** 驗曰季秋之甲子赤爵銜書入於豐止於昌戶其書曰敬勝怠者吉急勝敬者滅義勝欲者從欲勝義者凶凡事不強則村不敬則不正枉者廢滅敬者萬世以仁得之以不仁守之其量百世以不仁得之以仁守之其量十世以不仁得之以不仁守之不及其世 **原**琴操曰受命者謂文王受天 符命

命而王文王以紂時為岐侯躬修道德執行仁義百姓
親附是時紂為無道刳胎斲廢壞仁人天統易運諸
侯瓦解皆歸文王其後有鳳皇銜書於文王之郊文王
曰殷帝無道虐亂天下皇命已移不得復久乃作鳳皇
之歌其章曰翼翼翔翔彼鸞皇兮銜書來游以命昌兮
瞻天案圖殷將亡兮蒼蒼昊天始有萌兮神連精合謀
於房兮 尚書中候曰呂尚釣磻谿得玉璜刻曰姬受
命呂佐旌旌理也 呂氏春秋曰周文王時見大赤鳥銜
書集於周社文王曰火氣勝故其色上赤 墨子曰商
王紂時周武王見三神曰予既沈瀆殷紂於酒德矣汝

往攻之子必使汝大戡之 又曰赤鳥銜珪降周之岐
社曰命周文王伐殷有國河出錄圖地出乘黃天錫武
王黃鳥之旗 **增**宋志曰武王伐紂渡孟津中流白魚
入王舟王俯取魚長三尺目下有赤文成字言紂可伐
燔魚以告天有火自天止於王屋流為赤鳥烏銜穀焉
穀者紀后稷之德火者燔魚以告天天火流下應以吉
也 **源**周語內史過曰昔夏之興也夜融降於崇山其
亡也回祿信於聆隧商之興也檣杙次於丕山其亡也
夷羊在牧周之興也鸞鸞鳴於岐山其衰也杜伯射王
於鄆是皆神明之志者也 琴操曰魯哀公十四年西

帝王部 符命

狩薪者獲麟擊之傷其左足將以示孔子孔子道與相逢見俛而泣抱麟曰爾孰為來哉孰為來哉反袂拭面仰視其人龍顏日角夫子奉麟之口須臾吐三卷圖一為赤伏劉季興為王二為周滅夫子將終三為漢制造作考經夫子還謂子夏曰新主將興其人如得麟者尚書帝命驗曰東南紛紛注精紀昌光出軫已圖之鄭康成注曰謂劉氏也謂火精當起翼軫之野尚書考靈曜曰河圖子提期地留赤用藏龍吐珠鄭康成注曰河圖子劉氏而提起也珠寶物喻道也赤漢當用天之秘道故河龍吐之

增帝王世紀曰太上皇之妃曰媪

是為昭靈后名含始遊於洛地有玉雞銜赤珠出刺曰玉英吞此者王含始吞之生邦字季

原史記曰高祖

被酒夜經豐西澤中令一人行前行前者還報曰前有
大蛇當徑高祖乃前拔劍斬蛇蛇分為兩道開後人來
至蛇所有一老嫗夜哭問之嫗曰吾子白帝子化為蛇
當道今為赤帝子斬之因忽不見秦始皇帝常曰東南
有天子氣於是東遊高祖隱于芒碭山澤間呂后與人
俱求常得之高祖怪問呂后呂后曰季所在山居常有
雲氣故往常得季又曰范增說項羽曰沛公居東貪
於財貨好美姬今入關財貨無所取婦女無所幸此其

志不在小吾令人望氣皆為龍虎成五采此天子氣也

漢書曰高祖元年冬十月五星聚於東井從歲星也

東井秦分野漢以義取天下之應也

增拾遺記曰漢太上皇微時遊山

澤間有冶鑄曰若得腰間佩刀雜冶中即成神器可以克天下昂星精為輔可以殲三殍太上皇曰此物名也

首遂解投煙燄中及劍成授上皇上皇以賜高祖乃殲

三殍宅天下鈞命沒云蕭何昂星精項羽陳勝吳廣為

三殍 **原**漢書曰昭帝時上林柳樹斷臥地一朝起立

生枝葉有蟲食其葉成文字曰公孫病已立 又曰昌

邑王問社有枯樹復生枝葉睦孟以為木下民象當有

廢改之象公孫氏從民間受命為天子者後宣帝立帝

本名病已

增搜神記曰秦文公時陳倉人獵得獸若

羸不知名牽以獻之逢二童子童子曰此名為媚常在

地中食死人腦即欲殺之拍撫其首媚亦語曰二童子

名陳寶得雄者王得雌者霸陳倉人乃逐二童子化為

雉雌上陳倉北坂為石秦祠之雄者飛至南陽其後光

武興焉 後漢書曰初哀帝時夏賀良上言漢家曆運

中衰當再受命於是改號太初元年及王莽篡位忌惡

劉氏以錢文有金刀故改為貨泉或以貨泉字文為白

水真人後望氣者蘇伯阿遙見春陵郭喈曰氣佳哉鬱

鬱蔥蔥然初道士西門君惠李守等亦云劉秀當為天子
原東觀漢記曰光武帝夜生時有赤光室中盡明
皇考異之使卜者王長卜之長曰此善事不可言是歲
有嘉禾生一莖九穗長大於凡禾縣界大豐熟因名上
曰秀 又曰光武從邯鄲避王郎兵至滹沱河導吏還
言河水流澌無船不可渡左右皆惶畏為王郎所及上
命王霸前往視之實然霸念還言恐驚眾雖不可渡且
臨水止尚可為阻即白曰冰堅可渡士眾大喜上大笑
曰果妄言也叱至河流澌冰合可履強以囊盛沙布冰
上乃渡渡未畢數車而冰陷也 又曰上歸舊廬望見

廬南有火光以為人持火呼之光遂赫然屬天有頃不
見上異之 又曰諸將請上尊號初王莽時上與伯叔
及姊背鄧晨穰人蔡少公坐語少公道讖言劉秀當為
天子或曰是國師劉子駿也上戲曰何由知非僕也坐
者皆大笑時傳聞赤伏符不見文章軍中所上未信到
鄗上所與長安同舍諸生彊華自長安奉赤伏符詣鄗
與上會羣臣復伏固請乃命有司設壇於鄗之手歲亭
六月即皇帝位 按赤伏符曰劉秀發兵捕不道四夷雲
集龍闕於野四七之際火為主注云赤
伏符名漢德尚火赤火色伏藏也四夷雲集龍闕於野
羣雄角力也四七二十八也高祖至光武合二百二十
八年也一說光武
以二十八歲起兵 魏志曰桓帝時有黃星見於楚宋
帝王

之分遼東殷馘善天文言後五十歲當有真人起於梁
沛之間其鋒不可當至是凡五十年而太祖破袁紹天
下莫敵矣 吳錄曰孫堅墓上數有光如雲氣五色上
屬天下蔓延數里父老相謂曰此非凡氣孫氏其興乎
吳書曰孫堅母懷妊夢腸繞吳閭門孫策母懷策夢
月入懷懷孫權夢日入懷 武昌記曰孫權獵於樊山
見一姥問獵何得荅曰止得一豹姥曰何不豎其尾忽
然不見因為立樊姥廟 魏氏春秋曰明帝青龍三年
張掖郡刪丹縣金山元川溢涌寶石負圖狀象靈龜立
於川西有石馬七其一仙人騎之其一羈絆之其五有

形而不善成有玉匣開蓋於前上有玉字玉璣二玉璜
一又有麒麟在東鳳皇在南白虎在西犧牛在北馬自
中布列有字曰大紂曹金但取之此司馬氏革運之徵
增宋書曰吳之未亡也吳郡臨平湖一旦自開湖邊
得石函中有小青石刻作皇帝字舊言臨平湖塞天下
亂開則天下太平吳人以為祥俄而吳滅後元帝興於
江左吳亡後蔣山上常有紫雲術者曰江東猶有帝王
氣 宋書曰晉武帝咸寧元年大風吹帝社樹折有青
氣出社中占者以謂東甯有天子氣時琅邪武王伯封
東甯伯元帝祖也 **增**臧榮緒晉書曰王虞為鄱陽太

帝下

洪鑑類編卷四十七

符命

守有枯樟樹更生王敦表勸進中宗曰皓獸應瑞而來
臻樟樹久枯而更榮 孫盛晉陽秋曰秦始皇時望氣
者言五百年後金陵之地有天子氣 又曰太安中歲
鎮辰太白四星聚於牛女之間後中宗即位於揚州也
又曰太安中童謠曰五馬浮渡江一馬化為龍永嘉
大亂王室淪覆惟琅邪西陽汝南南頓彭城五王獲濟
至是中宗登阼先是五鐸見於晉陵若合符契 豫章
記曰松陽門內有大梓樹大四十五圍舉樹盡枯死永
嘉中一旦復更榮茂大興中元皇帝果繼大業庾仲初
揚都賦所云槐木蒼於豫章郭璞南郊賦云弊梓擢秀

於祖邑也宣帝祖為豫章太守故云祖邑也 **增**洞林
記曰晉中宗為丞相時有雞雛者而雀飛集其背驅而
復來如此再三占者云雞者酉酉者金火雀變而來赴
即王踐阼之象也 又曰元帝時三雀共登一雄雞背
三入安東廳占者以為當進三爵為天子 晉元帝永
嘉初有玉冊見於長安白玉麒麟神靈出於江寧其文
曰長壽萬年 晉書曰孝武帝始四歲時哀帝興寧三
年五月廬陵西昌縣修明家有榲栗樹是日忽復起生
及得位嗣統識者竊曰西昌修明之祥帝諱實應之矣
廣古今五行記曰晉安帝時冀州釋法稱將死告其

弟子普嚴曰嵩山神告我江東有劉將軍漢家苗裔當受天命吾以璧三十二枚並鎮金一餅與之劉氏卜世之數也嚴告同學法義法義以義熙十三年於嵩廟石壇下得玉璧三十二枚三十二者二三十也宋有天下享祚六十年 **原**徐爰宋書曰武皇帝彭城縣綏興里人夜生有神光之異室內盡明是夕甘露降於墓樹少嘗遊下邳遇一沙門於逆旅舍沙門言及中原多故又云江表尋復喪亂能拯之者其唯君乎其意甚切至初高祖患手創積年未瘳沙門因出懷中黃散一裹留之沙門既去高祖追而望之倏忽不見以散治創一傳而

愈餘散寶錄之每被金創輒用有驗 又曰高祖舉目瞻睇常見二龍在焉始尚微小及貴龍形漸長光色轉明左右侍者亦數見徵異 **增**宋志曰武帝少時誕節嗜酒自京都還息於逆旅逆旅嫗曰室內有酒自入取之帝入室飲於盜側醉臥地時司徒王謐有門生亦至此逆旅嫗曰劉郎在室內可入共飲酒比門生入室驚出謂嫗曰室內那得此異物嫗遽入帝已覺矣嫗密問向何所見門生曰見一物五采如蛟龍非劉郎門生還以白謐謐戒使勿言而與厚結 又曰武帝常遊京口竹林寺獨臥講堂前上有五色龍章衆僧驚之以白帝

帝獨喜曰上人無妄言南史紀曰齊高帝年十七時常夢乘青龍上天西行逐日宋明帝遣孫奉伯往淮陰帝與同室臥奉伯夢上乘龍上天於下捉龍脚不得及覺敘夢因謂曰兗州當大庇生靈而弟不得與也又曰參軍崔靈運夢天謂已蕭道成是我第十九子我去年已使授其天子位考自三皇五帝以降受命之次至帝爲十九也宋志曰元徽四年帝爲領軍從南郊望氣者陳安寶見太祖身上黃紫氣屬天安寶謂親人王洪範曰我少來未嘗見軍上有如此氣也談藪曰齊太祖在淮陰里城塹掘得古錫九枚下有篆書荀伯玉

諸人皆不能識時紀僧貞獨言曰何須辨此久遠之物錫而有九九錫之徵也帝喜而賞之南史紀曰昇明三年四月二十四日滎陽郡人尹千於嵩山東南隅見天雨石墜地石開有玉璽在其中璽方三寸文曰戊丁之人與道俱肅然入草應天符埽平河洛清魏都又曰皇帝運興千奉璽詣雍州刺史蕭赤斧赤斧以獻南齊紀曰武帝諱願字宣遠小諱龍兒生於建康青溪宅其夜陳孝后劉昭后同夢龍據屋上故上字焉南史紀曰梁武帝微時所居室中常若雲氣人或遇者體輒肅然行徑牛渚逢風入泊龍瀆有一老人謂帝曰君龍

行虎步相貴不可言天下方亂安之者其在君乎問其名氏忽然不見又曰初齊高帝夢展而登殿顧見武明二帝後一人手張天地圖而不識問之荅曰順子後及崔慧景之逼長沙宣武王懿入援至越城夢乘馬飛半天而墜帝所馭化為赤龍騰虛獨上時臺內有宿衛士為蜺常見太極殿有六龍各守一柱末忽失其二後見在宣武宅時宣武為益州蜺乃往蜀伏事及宣武在郢此蜺還都乃見六龍俱在帝所寢齋遂去郢之雍中途遇疾且死謂同侶曰蕭雍州必作天子具以前事語之後魏本紀曰孝文母李夫人皇興元年八月戊申

生帝於平城紫宮神光照於室內咸定錄曰隋末望氣者云龍門有天子氣連太原甚盛後唐高祖起義兵汾陽遂有天下天中記曰唐高祖仕隋為殿內少監時尚食奉御郭弘道善相言於高祖曰公天中伏犀下接於眉此非人臣之相高祖取弘道銀盆置地引弓射之謂曰向言有驗當一發中之既發應弦而中弘道曰願公事驗之日賞賜金盆高祖大悅後為太原留守鎮并州時武士護詰朝於街內獨行聞空中有言曰唐公是天子士護尋聲不見有人乃以白高祖并進兵書高祖悅之其夜士護夢高祖乘龍上天旦以狀聞後起太

原次臨汾去絳郡二十餘里有紫雲如華蓋樓閣之形
正臨高祖之上 武德六年車騎將劉山濤上書言高
祖龍潛時數往來洛郊之莊曾踐二石靴迹見於石中
至今猶在高祖令人鑿之深二寸餘其迹愈明乃止
洛中紀異曰唐高祖將舉義師西入長安夜夢忽身死
墜於牀下為羣蛆所食及覺甚惡之乃詣智滿禪師而
密語之滿即賀曰公得天下矣帝大驚謂滿曰何謂也
滿曰人臣不敢直指天子故曰陛下死是斃也墜牀是
下也蛆趨附也羣蛆共所食者是億兆趨附至尊之象
也甚吉又口貧道為沙彌日嘗工易今敢為公占之及

卦成曰得乾飛龍在天又是帝王之徵也帝至霍邑又
夢甲馬無數飛滿空中帝問是何軍伍對曰是公身中
之神也若無此何以威制天下言訖並飛入帝身帝覺
召太宗言之復曰吾事濟矣太宗拜於前連呼萬歲者
數四帝復大悅 冊府元龜曰高祖之臨岐州太宗時
年四歲有書生自言善相謁高祖曰公貴人也且有貴
子見太宗曰龍鳳之姿天日之表年將二十必能濟世
安民矣高祖懼其言泄將殺之忽失所在因采濟世安
民之義以為名焉 又曰太宗為秦王高祖有詩云聖
德合皇天五宿連珠見和風拂世民上下同歡宴帝於

宮西造宅初成高祖送玉璽以至於帝所搢紳相謂曰
詩及玉璽蓋秦國之祥瑞者歟 寓簡曰太宗未建義
時常飲酒醉臥劉文靜家文靜坐樓上見宅南大池中
有白龍下飲水池中大魚皆躍上岸以百數良久乃隱
太宗睡覺謂文靜云醉中渴甚夢入公家池中飲水極
清冷悵意文靜視其體猶濕也 冊府元龜曰高祖既
舉義師之日太宗所居處有紫雲當其上俄變為五色
狀如飛龍武德八年拜中書令嘗夜於嘉猷門見神人
長數丈素衣冠呼太宗曰我當令汝作天子太宗再拜
忽不見所居弘義宮中有一大池常時有佳氣鬱鬱數

百尺太宗獨異之至九年其氣轉盛上屬於天六月定
內難立為皇太子又有方士喬伏仁善言命見建成元
吉俱有爭心因謂所親曰秦王上應天籙當為元君此
二人乃驅除耳 又曰睿宗初生含涼殿則天乃於殿
內造佛氏有玉像焉及長閒觀其側玉像忽言爾後當
為天子 酉陽雜俎曰睿宗為冀王時寢齋壁上有蝸迹
成天字上懼遽掃之數日如初及即位雕玉鑄黃金為
蝸形分置於釋道像前 明皇始三歲封楚王時則天
御高樓抱之眺望誤墜於地左右失聲奔下扶擁帝怡
然無虧損之狀則天甚奇之 舊唐書曰明皇兼潞州

別駕州境有黃龍白日升天嘗出畋有紫雲在其上
逸史曰明皇臨潞州景龍二年四月十七日在廳事假
寐白鶴觀道士宋大辨等三十人同見赤龍據案上微
時常至洛陽令崔日知宅崔設饌未熟明皇因寢庭前
一架藤花初開日知見巨蛇食藤花逡巡不見上覺曰
飢甚夢中食藤花甚美日知乃知他日啓聖之驗也
國史纂異曰中宗將入朝有軍人韓凝禮自謂知兆上
因以食箸試之既布卦一箸無故自起凡三偃三起觀
者以為大吉徵舊唐書曰中宗將祀南郊明皇來朝
京師將行使術士韓禮筮之著一莖孑然獨立禮驚曰

著立奇瑞非常之事也不可言 冊府元龜曰開元二
年八月太子賓客薛謙光獻東郡九鼎銘其豫州鼎銘
武后所製文曰犧農首出軒昊應期唐虞繼踵湯武乘
時天下光宅宇內雍熙上元降祉方建隆基宰相姚崇
盧懷慎等為天子早著冥符臣等今見薛謙光所獻東
郡鼎銘大聖天后所製其文云上元降祉方建隆基豫
州處天地之中所以遠包四海銘文獨聖后所製固必
先感二儀靈慶昭彰曠絕古今臣等忝陪近侍喜萬常
情請宣付史官并頒示內外許之 天中記曰開元八
年鄭州人元承徽上封事曰謹按魏典及北齊志後魏

太平真君九年內學者奏言上黨有天子氣在壺關大
王山於時太武南巡親幸上黨掘大王山累石爲三封
又斬其北鳳皇山南足以斷之臣等恭尋符命壺關天
子之氣正是陛下當焉元宮上睦符命下鍾故使歷試
潞州所以用當其應此天意也豈人事乎然而一幸潞
州三移灰瑄壺關之地歲時爲蒐狩之場大王之山朝
夕即豫遊之所始而龍潛上黨尋乃鳳舉咸京內學之
言果合符契伏願陛下上承天命下諭人心昭告寰瀛
編列國史從之 冊府元龜曰肅宗初爲皇太子明皇
幸蜀留肅宗在後宣諭百姓自奉天而北夕次永壽百

姓遮道獻牛酒有白雲起西北長數丈如樓閣之狀議
者以爲天子之氣自是紫雲擁帝所乘馬聚散不時至
平涼郡路傍遇一伏兔命左右索弓箭因謂左右曰吾
若破賊射則中之不然則否一發而斃左右咸稱萬歲
上初發平涼有彩雲浮空而去上行至豐寧南見黃河
天塹之固欲整軍北渡以保豐寧忽大風飛沙跬步之
間不辨人物及迴軍趨靈武風沙頓止天地廓清舊
唐書曰宣宗初封光王十餘歲時遇重疾沈綴忽有光
輝燭身蹶然而興正身拱揖如對臣寮乳媪以爲心疾
穆宗視之撫其背曰此吾家英物非心憊也賜以玉如

意御馬金帶嘗夢乘龍升天言之於鄭后乃曰此不宜
人知者幸勿復言 真陵十七事曰宣宗在藩時常從
駕回而誤墜馬人不之覺比二更方能興時天大雪四
顧悄無人聲上寒甚會巡警者至大驚上曰我光王也
方困且渴若爲我求水警者即於旁近得水以進遂委
而去上良久起舉甌將飲顧甌中水盡爲芳醪矣上喜
獨自負舉一甌已而體微煖有力步歸藩邸後遂即帝
位 稽神錄曰梁開平二年使其將李思安改潞州營
於壺關伐木爲柵破一夫木中朱書文六字曰天十四
載石進思安表上之其羣臣皆賀以爲十四年必有遠

夷貢寶者司天少監徐鴻獨謂其所親曰丙申之歲當
有石氏王此地者天字取四字中兩畫加之於旁則丙
字也移四字外圍以十貫之即申字也後至丙申歲晉
高祖以石姓起并州如鴻之言 後漢高祖爲河東節
度使天福十一年太原葭蘆茂盛最上一葉如旗狀皆
南指明年遂即帝位 周太祖微時嘗晝寢有物如小
虺五色出入額鼻之間在太原時有神尼同姓見太祖
謂李瓊曰我宗天上大仙當爲世界主瓊詰其故曰頂
上有肉角也及爲樞密時北征如澶淵旭旦日邊有紫
光當太祖馬首之上高不及百尺從官異之至鄴都一

夕在亭院齋忽有黃氣起於前繚繞而上遽際於天太祖於黃氣中仰見星文紫微文昌爛然在目駭曰予在室中而見天象不其異乎密告知星者乃拜賀曰坐見天衢物不能隔至貴之祥也異日又於署衙中有紫氣起於旛竿龍頭之上凡二日觀者異之及討李守真於河中守真登陣瞰陣氣色不懌獨言曰是何妖變後城中人言見太祖軍上有紫氣如樓閣車蓋之狀故也五代史補曰世宗在民間嘗至江陵有卜者王處士世宗因往問焉方布卦忽有一著躍出卓然而立卜者大驚曰吾家著法十餘世矣常記曾祖以來遺言凡卜筮

而著自躍出者其人貴不可言況久卓然不倒得非為天下之主乎遽起再拜世宗雖佯為詰責而私心甚喜通鑑曰董遵誨父宗本仕漢為隋州刺史宋太祖微時客遊至漢東依宗本遵誨憑藉父勢常侮之一日謂太祖曰每見城上紫雲如蓋又夢登高臺遇黑蛇約長百丈餘俄化龍飛騰東北去雷電隨之是何祥也太祖皆不對後太祖辭宗本去自是紫雲漸散及即位一日便殿召見遵誨因諭之曰卿尚記往日紫雲及龍化之夢乎遵誨再拜呼萬歲宋史紀曰太祖嘗試惡馬不施衛勒馬逸上城斜道額觸門楣墜地人以為首必碎

太祖徐起更追馬騰上一無所傷又嘗與韓令坤博土室中雀鬪戶外因競起掩雀而室隨壞 邵氏聞見錄曰宋藝祖微時入洛至長壽寺大佛殿枕柱礎晝寢有藏經院僧見赤蛇入帝鼻帝寤僧問所向帝曰欲見柴太尉於澶州無資僧曰某有一驢可乘又以錢幣為獻帝遂行太尉一見奇之留幕府未幾柴即天子位是為周世宗帝與宣祖俱事之後遂受禪於周 宋劉原父嘗齋太乙宮與王堯臣夜語曰歲星往來虛危間其色甚明以吾觀之當有興於齊者歲餘英宗以齊州防禦使入繼大統 續夷堅志曰靖康之變康王嘗質金人

軍中及遣還康王奔相州召兵勤王因登郡圃飛仙亭視其牌額持弓矢而祝曰若中此牌則必聞京師音耗三發三中左右動色相賀又語幕府曰夜來夢皇帝脫所御袍賜吾吾解舊衣而服所賜此何祥也頃時詔來命為大元帥速領兵入衛時王發兵相州使臣馳報黃河未凍眾失色王禱天地河神而河冰凍已合遂渡河揮塵錄曰顯仁后在北地未知高宗即位嘗用象碁局裹以黃羅書康王字貼於將上焚香禱曰令三十二子俱擲於局若康王字入九宮者必得天位一擲其將子果入九宮他子皆不近后喜甚即具奏徽廟大喜謂

后曰瑞卜昭應異常可無慮矣嘉興志曰佛宇挂鐘之閣多虛其中宋孝宗幼歲時偶至秀州東塔寺登鐘樓遊戲而僧徒先以蘆蔭覆空處上誤履其上遂并墜焉旁觀者失色亟視之乃屹立席上略無怖容先夕主山者夢金龍挂於樓閣間翌日而見孝宗之事遼史曰太祖幼時自言左右若有神人翼衛金太祖本紀曰遼道宗時有五色雲氣屢出東方大若二十斛困倉之狀司天孔致和竊語人曰其下當生異人建非常之事後咸雍四年金太祖生金史曰太祖親征黃龍府次混同江無舟上乘赭白馬徑涉曰視吾鞭所指而行

諸軍隨之水及馬腹後使舟人測其渡處深不得其底

又曰金世祖為東京留守時一日方寢紅光照室及

黃龍見寢室上通鑑曰元兵至浙駐師於錢塘沙上

宋太后遙祝曰海若有靈當使波濤大作一洗而空之

潮汐三日不至名山藏曰元時太史言聖人生江淮

帝實應之謂明太祖又曰太祖初生浴汲河水水浮紅羅

遂取為衣又曰元末羣盜四起郭子興據濠梁太祖

在皇覺寺欲從子興卜玆於伽藍神數祝皆陰帝曰莫

不容子舉大事否請復陰玆果陰再沒之玆躍然再立

又曰太祖為吳王時有一老人告省局匠曰吳王即

位三年當平一天下匠驚問之曰我太白神也忽不見
又曰明成祖初舉兵風雨四起咫尺昏迷少焉東方
雲開露青天尺許有光燭地暎徹上下將士皆喜

符命二

原天錫洪範 河出馬圖 尚書云天乃錫禹洪範九疇

出書聖人則之 受命 藏氣 榮光 休氣 俱 **增**河遊五

老 周見三神 五老堯之瑞 三神武之瑞 黃魚化玉 赤雀銜書

黃魚湯之瑞 赤雀文王之瑞 翠嬀魚躍 陳寶雞鳴 翠嬀堯之瑞 陳寶光武

瑞 龍馬負甲 鳳皇銜書 龍馬堯之瑞 鳳皇文王之瑞 朱草茁

莫英滋 堯 流星入昴 五緯聚房 流星堯之瑞 五緯周之瑞

岐山鳴鳳 牧野飛龍 俱周之瑞 黃鳥之旗 白蛇之劍

黃鳥旗武王事 白蛇劍漢高帝事 滹沱冰合 臨平湖開 冰合漢光武之瑞

湖開晉元帝之瑞 期在甲子 人是戊丁 甲子武王事 戊丁南史昇明三年

事以上俱見符命一 赤雁白麟 黃旗紫蓋 漢書武帝幸東海獲赤雁幸雍獲白

麟遂作赤雁白麟之歌 吳志 桑陰似蓋 蘆葉如

旗 蜀志曰先主舍旁有桑樹高五丈餘遙望如車蓋或謂當出貴人先主少時與諸兒於樹下戲言吾必當

乘此羽葆車蓋 下後 五馬渡江 六龍守柱 五馬漢高祖事詳符命一

帝事六龍 白魚入舟 赤龍據案 白魚武王之瑞 赤龍唐明皇

齊高帝事 龍瀆告祥 智滿賀夢 龍瀆梁武帝事 智滿唐高祖事 食箸三

起 著草獨立 食箸唐中宗事 著草周世宗事 西昌修明之祥 東

帝王事 符命

堯琅邪之瑞 西昌晉孝武事 東莞晉元帝事以上俱詳符命一 五運推移

三靈改卜 宋太祖即位赦詔 披皇圖 稽帝文 握乾符

叶靈圖 俱出文選 原荀卿傳祕記 尹敏增圖識 後漢荀

戒子統曰吾締帙中有先祖所傳祕記為漢家所用爾其修之統遂學焉朝廷多訪之尹敏博通經史帝使

校圖識敏增之曰帝無可為輔帝不之罪亦以沈滯 龍馬出圖於河伏羲觀之

以畫八卦 神龜負書於洛夏禹衍之以成九疇

魏膺當塗之讖 晉有石瑞之文 流火赤雀實紀周

祚 雕雲素靈發祥漢氏 俱南齊祥瑞志

符命三 原神武有徵應 班彪王命論 里社鳴聖人出 黃河清聖

人生 夜融降於崇山 禱杙次於丕山 並詳符命一 姬

受命 尚書中候 卯金興 河出圖 雒受法 尚書中候 黃精

受道 河精受圖 尚書中候 握圖書 得地符 元女授

符 詳武功篇 湯受金符 詳應運篇 奉赤伏符 光武詳符命一 蒼代

元 持金精 握金鏡 擊玉鼓 朕由薄承 出軫

握命 尚書考靈耀 仁命在豐 當璧而拜 詳恒山篇 代殷者

為姬昌 代漢者當塗高 五曜霄映 五星聚房井

詳符命一 四星聚牛女 晉陽秋 鎮星入關 黃星見楚宋

魏志 參御馬 卯生虎 青雲扶日 黃雲蓋之 並詳

紫雲見於車上 宋書 嘉氣飛於庭前 千秋賦 御天社

帝王部 符命 卷四十七

內有赤紫氣 漢書 長安獄中有天子氣 漢書 黃雲見河

神龍見譙 尚書考 神龍至 尚書考 龍吐珠 尚書考 天果命湯

白虎戲朝 詳應 狐藜房 運篇 狼銜鈎 詳應 赤烏銜珪 墨子

赤烏銜書 周文 鳥王命明 尚書 魚鳥有卵 尚書 黃雀立日

旁 考異 赤雀止昌戶 尚書 赤魚遊護 尚書 赤人出洛

武王伐紂卜而龜燬 說 靈龜服 神龜出 五

鐸啓號於晉陵 晉書 棧鐘告成於會稽 文昌殿朱草

自生 臨平湖草木自除 臥柳生枝 漢書 斃梓擢秀

郭璞南 梧桐常生 枯梓更榮 豫章 臥有光耀 漢書 賣

神光照室 魏本 光耀滿室 留飲酒售 賣

麴大售 漢宣 肆伐大商會朝清明 爰茲發迹 斷

蛇奮旅 大雨洗兵 大風落兵 邢丘大雨 昆陽

雨注 盟津波罷 河洛開輿 符命用出 元德升

間 皇天眷命 以讖命官 有道則見 **增** 申命 經書

命 曰天其中 簡在 書經曰惟簡 維新 詩經曰其 佑

德 書經曰惟天 助順 禮記曰天之 天授 漢書曰高

力 非人 黃威寶命 顏延年郊祀歌曰黃 卜年卜世 左

成 王定鼎於郊 河榮洛變 元玉素鱗 春陵佳氣 光 滹沱冰合

露 表河榮洛變授祉於武 春陵佳氣 光 滹沱冰合

光 乘龍逐日 齊高帝以上 符命 夢筆畫衣 齊志曰武帝

武 乘龍逐日 齊高帝以上 符命 夢筆畫衣 齊志曰武帝

帝 王部 符命

符命

符命

人從天飛下頭插筆來畫上衣兩
邊庾溫釋云畫者山龍華蟲也
甲馬飛空唐高祖

白龍飲池 夢食藤花唐明皇 赤蛇入鼻宋太祖 神人

翼衛俱詳符命以上 五雲網緼如車蓋名山藏曰明太祖至發擊元將

於梅花門大破之先一日城中人望見 兵端有火光

五色雀集旗竿俱明成祖 逐燕高飛名山藏曰建文時有道士歌於途曰

莫逐燕逐燕日高飛高飛 上帝畿後成祖起兵於燕

符命四

原文漢司馬相如封禪文曰伊上古之初肇自昊穹之
生民歷選列辟以迄於秦率邇者踵武逖聽者風聲紛
綸葳蕤湮滅而不稱者不可勝數也繼韶夏崇號謚略

可道者七十有二君尚書曰元首明哉股肱良哉因斯
以談君莫盛於唐堯臣莫賢於后稷后稷創業於唐公
劉發迹於西戎文王改制大行越成故軌迹夷易易遵
也湛恩麗鴻易豐也憲度著明易則也垂統理順易繼
也是以業隆於極祿而崇冠乎二后未有殊尤絕迹可
考於今者也然猶躡梁父登太山建顯號施尊名大漢
之德漢音涌源泉沕滴曼衍旁魄四塞雲布霧散上暢
九垓下泝八埏昆蟲闔憚迴首面內然後囿騶虞之珍
羣徵麋鹿之怪獸導一莖六穗於庖犧雙醕共觝之獸
招翠黃乘龍於沼欽哉符瑞臻茲猶以為德薄不敢道

帝王雜

符命

符命

封禪蓋周躍魚隕航休之為燎此之為符也以登介丘
不亦愬乎進讓之道何其爽與於是大司馬進曰陛下
仁育羣生義征不諛德侔往初功無與二意者泰山梁
父設壇場望幸蓋上帝垂恩儲祉將以慶成陛下謙讓
而弗發也絜三神之歡缺王道之儀羣臣愬焉夫修德
以錫符奉命以行事不為進越也故聖王不替而修禮
地祇謁款天神勦功中嶽以章至尊皇皇哉斯事天下
之壯觀王者之不業不可貶也願陛下全之俾萬世得
激清流揚微波飛英聲騰茂實前聖之所以永保鴻名
而常為稱首者用此宜命掌故悉奏其儀而覽焉於是

天子沛然改容曰俞乎朕其試哉乃遷思迴慮總公卿
之議詢封禪之事詩大澤之博演符瑞之富遂作頌曰
自我天覆雲之油油甘露時雨厥壤可遊滋液滲漉何
生不育嘉穀六穗我穡曷蓄匪惟雨之又潤澤之匪惟
徧之我汜布濩之名山顯位望君之來君乎君乎侯不
邁哉般般之獸樂哉君囿白質黑章其儀可嘉皎皎穆
穆君子之態蓋聞其聲今視其來厥途靡從天瑞之徵
茲爾於舜虞氏以興濯濯之麟遊彼靈時孟冬十月君
徂郊祀馳我君輿帝以享祉宛宛黃龍興德而升正陽
顯見覺悟黎蒸於傳載之云受命所乘依類託寓喻以

封巒拔藝觀之天人之際以交上下相發允荅聖王之
事兢兢翼翼故云於興必慮衰安必思危是以湯武至
尊嚴不失肅祗舜在假典顧省闕遺此之謂也 漢揚
雄劇秦美新曰上罔顯於羲皇中莫盛於唐虞邇靡著
於成周仲尼不遭用春秋因斯發言神明所祚兆民所
託罔不云道德仁義禮智獨秦崛起西戎因襄文宣靈
之僭迹立基孝公茂惠文奮昭莊至政破從擅衡并吞
六國遂稱乎皇帝盛從鞅儀韋斯之邪政馳騫起翦恬
貴之用兵剗滅古文刮語燒書弛禮崩樂塗民耳目遂
流唐漂虞滌殷蕩周難除仲尼之篇籍自勒功業改制

度軌量咸稽之於秦紀是以耆儒碩老抱其書而遠遜
禮官博士卷其舌而不談二世而亡何其劇歟帝王之
道兢兢乎不可離已夫能貞而明之者窮祥瑞回而昧
之者極妖愆故若古者稱堯舜威侮者陷桀紂况盡汛
埽前聖數千載功業專用已之私而能享祐者哉會漢
祖龍騰豐沛奮迅宛葉自武關與項羽勦力咸陽創業
蜀漢發迹三秦克項山東而帝天下擗秦政慘酷尤煩
者應時而蠲如儒林刑辟歷紀圖典之用稍增焉秦餘
制度項氏爵號雖違古而猶襲之是以帝典毀而不補
王綱弛而未張逮至大新受命上帝還資后土顧懷元

帝王部

符命

符命

符靈契雲動風偃震聲日景炎光飛響盈塞天淵之間
乃奉若天命窮寵極崇與天剖神符地合靈契創億兆
規萬世卓哉煌煌真天子之表也若夫白鳩丹鳥素魚
斷地方斯茂矣是以發祕府覽書林遙集乎文雅之圃
翱翔乎禮樂之場胤殷周之失業紹唐虞之絕風懿律
嘉量金科玉條煥爛照耀靡不宣臻振鷺之聲充庭鴻
鸞之黨漸階俾前聖之緒布濩流行而不韞積郁郁乎
煥哉天人之事盛矣鬼神之望允塞紹少典之苗著黃
虞之裔帝典闕者已補王綱弛者旣張炳炳焯焯豈不
懿哉而述前典巡四民迄四岳增封泰山廣禪梁甫斯

受命者之典業也崇嶽滄海通瀆之神咸設壇場望受
命之增焉海外遐方信延頸企踵回面內嚮喁喁如也
帝者雖勤讓惡可以已乎宜命賢哲作典引一篇以示
來人摛之罔極令萬世常戴巍巍履粟粟顛馨香含甘
寶鏡純粹之至精聆清和之正聲則百工伊凝庶績咸
熙荷天衢提地釐斯天下之上則已庶可試哉

原典引後漢班固典引曰陶唐舍胤而禪有虞有虞亦
命夏后稷契熙載越成湯武股肱旣周天乃歸功元首
將授漢劉俾其承三季之荒末值亢龍之災孽懸象闔
而恒文垂彝倫敷而舊章緜高光二聖宸居其域赫赫

聖漢巍巍唐基泝溯其源乃先孕虞育夏甄殷陶周然後宣二祖之重光讓四宗之緝熙神靈日照光被六幽仁風翔於海表威靈行乎鬼區盛哉皇家帝世德臣列辟功君百王榮鏡宇宙渙揚寓內是以來儀集羽族於觀魏肉角馴毛宗於外囿擾緇文皓質於郊升黃輝采鱗於沼甘露宵零於豐草三足騫翥於茂樹若乃嘉穀靈草奇獸神禽應圖合牒窮祥極瑞者朝夕坰牧日月邦畿卓犖乎方州洋溢乎要荒昔周姬有素雉朱烏元秬黃粳音伴之事耳君臣動色左右相趨濟濟翼翼峨峨如也啓恭館之金騰御東序之祕寶是時聖上固已垂

精遊神苞舉藝文屢訪羣儒俞咨故老與之斟酌道德之淵源肴覈仁義之林藪以望元符之臻焉將緝萬嗣揚洪暉奮炎景扇遺風播芳烈久而逾新用而不竭汪汪乎丕天之大律其疇能亘之哉唐哉皇哉皇哉唐哉原頌魏傅遐皇初頌云尋盛德以降應著顯符於方臻積嘉祚以待期儲鴻施於真人昔九代之革命咸受天之休祥匪至德其焉昭匪至仁其焉章懿大魏之聖后固上天之所興應靈運以承統排闥闔以龍升攄皇象以闡化順帝則以播音遵陽春以行施揆四時以立信運聰明以舉善宣柔惠以養人於赫我后邁德如神化

帝王部

洪範卷四十七

符命

卷

不朞月令不浹辰於是天地休豫靈祇歡欣嘉瑞雲集
四靈允臻甘露宵零於宮庭醴泉冬涌於中原白雉素
烏丹芝朱魚鱗集羣萃不可勝書信應天之美瑞受命
之靈符也然後覽公卿之讜議詢百寮之典謨天子乃
登彫輦戴羽蓋佩玉鏘鏘鑾聲噦噦拜上皇告受位兆
休祥導神氣於是建皇始之上元發曠蕩之明詔眚災
肆赦盪滌瑕穢崇設九賓溥延公卿嘉羞千品俎豆充
庭金石俱懸鐘鼓畢作歌九功舞八佾鴻澤普皇恩洽
民欲得神望塞

原敘後漢傅幹王命敘曰在昔唐虞之禪列於帝典殷

周之代敘於詩書天之曆數昭焉著明周篤后稷公劉
積德行仁至乎文武遂成王業雖五德殊運或禪或征
其變化應天與時消息其道一也故雖有威力非天命
不授雖有運命非功烈不章自我高祖襲唐之統受命
龍興討秦滅項光有萬國世祖攘亂奄復帝宇人鬼協
謀禎祥煥然皆順乎天而應乎人也然則帝王之起必
有天命瑞應自然之符明統顯祚豐懿之業加以茂德
成功賢智之助而後君臨兆民為神明所保佑永世所
尊崇未見運敘無紀次勳澤不加於民而可力爭覬覦
神器者也豪傑見二祖無尺地之階為專智力乘釁而

起不知天祚聖哲帝王自有真也哀哉非徒闇於將來
又不考之於既往矣自開闢以來姦雄妄動不識天命
勇如蚩尤強如其工威如夷羿然皆從分橫裂爲天下
戒又況淺智小才勇不足畏強不足憚未有成資而敢
失順視不軌之事也哉夫行潦之流不致江海之深丘
埳之資不成泰山之高魚鼈之類不希雲龍之軌一官
之守不經天人之變當王莽之末英雄四起而鄧禹耿
弇識世祖之福祚嬴糧間行進其策謀遂荷肯附之任
享佐命之寵張元慕蘇秦蒯通之業周旋驅述西說實
融言未及終而梁統已誅之矣禹弇見命祚之兆其福

如彼張元蔽順逆之理其禍如此審斯二事趣舍之分
明矣且世祖之興有四一曰帝皇之正統二曰形相多
異表三曰體文而知武四曰履信而好士加之以聰明
獨斷達於事機發策如神應視遠如見近偏旅首進摧
莽軍百萬之衆單師獨征平河北萬里之功識鄧隆之
將敗知劉興之必死然猶乾乾日昃博采訓咨拔吳漢
於小尹擢馬武於行伍寵功臣以兼國之爵顯卓茂以
非次之位言語政事文學之士咸盡其材致之宰相權
勇畢力於征伐搢紳悉心於左右此其所以成大業也
高祖方娠有雲龍之表其始入秦五星同軌以旅於東

井在天之符也世祖之徵符其詳可聞也其初育則靈光鑿於室隩嘉禾滋於邑壤其望舊廬有火光之異其渡滹沱有冰合之應西門君惠先識其諱疆華獻符千里同驗劉歆改名而隕其身王長錯卦而見吉兆故王遵謂之天授非人力也覽廢興之運會觀徵瑞之攸祚審天應之萌兆察人物之所附念功成而道退無非次而妄據後之人誠能昭然遠覽矚然深悟收莽述之闇惑忠鄧耿之弘慮好謀而要成臨事而知懼距張元之邪說思在三之明數則福祿衍於無窮亦世不失其通路矣

論後漢班彪王命論曰在昔帝堯之禪曰咨爾舜天之歷數在爾躬舜亦以命禹暨於稷契咸佐唐虞光濟四海奕世載德至於湯武而有天下雖其遭遇異時禪代不同至於應天順民其揆一焉是故劉氏承堯之祚氏族之世著於春秋唐據火德而漢紹之始起沛澤則神母夜號以彰赤帝之符由是言之帝王之祚必有聖明顯懿之德豐功厚利積累之業然後精誠通於神明流澤加於生民故能為鬼神所福嚮天下所歸往未見運世無本功德不紀而得崛起在此位者也世俗見高祖興於布衣不達其故以為適遭暴亂得奮其劔遊說

帝王

符命

符命

之士至比天下於逐鹿幸捷而得之不知神器有命不可以智力求悲夫此世之所以多亂臣賊子者也若然者豈徒闇於天道哉又不睹之於人事矣夫餓饉流隸飢寒道路思有短褐之藺擔石之蓄所願不過一金終於轉死溝壑何則貧窮亦有命也況乎天子之貴四海之富神明之祚可得而妄處哉故雖遭罹厄會竊其權柄勇如信布強如梁籍成如王莽然卒潤鑊伏鑕烹醢分裂又況么麼不及數子而欲闇干天位者乎是故駑蹇之乘不騁千里之途燕雀之儔不奮六翮之用橐梳之材不荷棟梁之任斗筲之子不執帝王之重易曰鼎

折足覆公餗不勝其任也當秦之末豪傑並起共推陳嬰而王之嬰母止之曰自吾爲子家婦而世貧賤今卒富貴不祥不如以兵屬人事成少受其利不成禍有所歸嬰從其言而陳氏以寧王陵爲漢將而母獲於楚有漢使來陵母見之謂曰願告吾子漢王長者必得天下子謹事之無有貳心遂對漢使伏劍而死以固勉之夫以匹婦之明猶能推事理之致探禍福之幾而況大丈夫之事乎是故窮達有命吉凶由人嬰母知廢陵母知興此二者帝王之分洩矣蓋在高祖其興也有五一曰帝堯之苗裔二曰體貌多奇異三曰神武有徵應四曰

寬明而仁恕五曰知人善任使加之以信誠好謀達於
聽受見善如不及用人如由己從諫如順流趨時如響
赴當食吐哺納子房之策拔足揮洗捐鄙生之說悟成
卒之言斷懷土之情高四皓之名割肌膚之愛舉韓信
於行陣收陳平於亡命英雄陳力羣策畢舉此高祖之
大略所以成帝業也若乃靈瑞符應又可略聞矣是以
王武感物而折契呂公觀形而進女秦皇東遊以厭其
氣呂后望雲而知所處始受命則白蛇分西入關則五
星聚故淮陰留侯謂之天授非人力也歷古今之得失
驗行事之成敗取舍不厭斯位符瑞不同斯度而苟昧

權利越次妄據外不量力內不知命則必喪保家之主
歿天年之壽遇折足之凶伏斧鉞之誅英雄誠知覺寤
收陵嬰之明分絕信布之覬覦拒逐鹿之瞽說審神器
之有授貪不可冀毋為二母之所笑則福祚流於子孫
天祿其永終矣 魏陳王曹植魏德論曰元氣否塞元
黃憤薄星辰亂逆陰陽舛錯四海鼎沸蕭條沙漠武皇
之興也以道凌殘義氣風發神戈退指則妖霧順制靈
弧雲舉則朝陽播越唯我聖后神武蓋天威光佐埽辰
彗北彎首尾爭擊氣齊率然乃電北席卷千里隱乎若
崩嶽盱乎若潰海愜彼蠻夏蠢爾弗恭脂我蕭斧簡武

鍊鋒星陳而天運振耀乎南封荆人風靡交益影從軍
蘊餘勢襲利乘權蕩鬼區於白水撓矯制乎遐川仰屬
目於條支晞弱水之潺湲薄張騫於大夏笑驃騎於祁
連其化之也如神其養之也如春柔遠能邇誰敢不賓
憲度增飾日耀月光迹存乎建安道隆乎延康於是漢
氏歸義顧音孔昭顯禪天位希唐放堯上猶謙謙弗納
也發不世之明詔薄皇居而弗泰蹈北人之清節美石
戶之高介義貫金石神明以興坤祇致祥乾靈效祐於
是羣公卿士功臣列辟率爾而進曰昔文王三分居二
以服事殷非能之而弗欲蓋欲之而弗能況天網不禁

皇網圯紐侯民非復漢萌尺土非復漢有故武皇創跡
於前陛下光美於後蓋所謂勳成於彼位定於此者也
將使斯民播秬鬯植靈芝鉏六穰挹醴滋遂乃凱風迴
款甘露匝時農夫詠於田壟織婦吟而綜絲黃吻之齟
含哺而怡台背之老擊壤而嬉古雖稱乎赫胥曷若斯
之大治乎於是上富於春秋聖德汪濊奇志妙思神鑒
靈察方將審御陰陽增耀日月極禎祥於遐奧飛仁風
以樹惠旣遊精萬幾探幽洞深道遙六藝兼覽儒林抗
思乎文藻之場囿容與乎道術之疆畔超天路而高峙
階青雲以妙觀將參迹於三皇豈徒論功於大漢天地

位矣九域清矣皇化四達帝猷成矣明哉元首股肱貞
矣禮樂既作興頌聲矣固將封泰山禪梁甫歷名川以
祈福周五方之靈宇越八九於往素踵帝皇之靈矩流
餘祚於蒸黎鍾元吉乎聖主 隋李德林天命論曰有
娥元鳥商以興焉姜嫄巨跡周以興焉邑姜夢帝隋以
興焉古今三代靈命如一天下之重不可妄據軒初四
帝周餘六王藉勢因基自取而不得也孟軻稱仲尼之
德過於堯舜著述成帝者之事弟子備王佐之才墨不
代蒼泣鱗歎鳳栖栖汲汲雖聖達而莫許也蚩尤則黃
神抗衡共工則黑帝就敵項羽誅秦摧漢宰割神州角

逐爭驅盡威力而無就也其餘歛起妖妄何足數者若
使四凶執八元之誠三監懷九臣之志韓信彭越深明
帝子之符孫述隗囂妙識真人之出尉迥同謳歌之類
王謙比獄訟之民福祿蟬聯胡可窮也而違天逆物獲
罪神人嗚乎此前事之大戒矣誅夷烹醢歷代共尤僭
逆凶邪時煩獄吏其不戒慎何哉蓋積惡旣成心自絕
於善道物類相感理必至於誅戮天奪其魄鬼惡其盈
故也大帝聰明羣臣正直耳目監於率土賞罰參於國
朝輔助一人覆育兆庶豈有食人之祿受人之榮包藏
禍心不殲盡者也必當執法未處其罪司命已除其籍

自古明哲慮遠防微位尊而心愈下祿厚而志彌約納
寵思之以懼道高守之以恭克念如此則奸回不至謙
光滿復義在知幾吉凶由人歿不自作夙沙則主雖愚
蔽民盡知歸有苗則始為跋扈終而大服漢南諸國見
一面以從殷河西將軍率五郡而臣漢故能招信順之
助保泰山之安也

原述魏邯鄲淳上受命述曰伊上天闡載自民主肇建
歷聽風聲陶唐為盛虞夏受終殷周革命有禪而帝有
代而王禪代雖殊大小繇同於是以漢歷在魏赤運歸
黃也是故大魏之業皇耀震霆肅清宇內萬邦有截師

義翼漢奉禮不越飭躬勩力茂亮弘烈樹深根以厚基
播醇澤以釀味含光而弗耀戩翼而弗發將俟聖嗣是
遂是達聖嗣承統爰宣重光陳錫裕下民悅無疆三神
宜釐四靈順方元龜介玉應龍粹黃若云魏德據茲以
昌爾乃鳴玉陟壇三摺以俟既受休命龍旋鳳跕煌煌
厥暉穆穆容止臨下有赫允也天子既踐帝位納璽要
紱太常司燎升炮告類圭璋峨髦士棣棣踴躍聖躬
御策以泣巍巍乎崇功顯顯乎德容信帝者之壯業天
休之所鍾也於是天地咸和日月光精氛祲不作風塵
弭清凡在壇場之位舉目乎廣庭莫不君臣和德咸玉

色而金聲屢省萬幾訪謀老成治詠儒墨納策公卿昧
旦孜孜夕惕乾乾務在諧萬國敘彝倫而折不若懷遠
人混六合之風納於仁壽之門刑措靡試偃伯靡軍然
後乃勤功岱嶽升中上元斯固我皇之大謨思心之所
存也

原表魏邯鄲淳上受命述表曰臣聞雅頌作於聖德典
謨興於茂功德盛功茂傳序無忘是故竹帛以載之金
石以聲之垂諸來世萬載彌光陛下以聖德應期龍飛
在位其有天下也恭己以受天子之籍無爲而四海順
風若乃天地顯應休徵祥瑞以表聖德者不可勝載鑠

乎煥顯真神明之所以祚命世之令主也凡自能言之
類莫不謳歌於野執筆之徒咸竭文思獻詩上頌臣抱
疾伏蓐作書一篇欲謂之頌則不能雍容盛懿列伸元
妙欲謂之賦又不能敷演洪烈光揚緝熙故思竭愚稱
受命述

檀對馮萬石曆數對曰臣聞天地草昧洪鈞列五運之
期雲雷始屯火德分一人之位莫不時來命偶人迪天
將白環昭虞后之功元圭錫夏王之德空桑負鼎遇爲
牲之君渭水張羅得非熊之相伏惟陛下化光坤載道
叶乾行總五氣以發生籠百王而亭育粵若稽古推曆

數之存亡感而遂通酌天人之符命明揚側陋典采芻
詞開闢大猷旁求雅問則天文幽遠誠匪管窺然人事
昭彰敢陳壅塞原夫興亡有數符命無差遽啓丹書俄
迴白璧君臣道合則遐邇乂安上下情乖則邦家板蕩
水火革而天人順暴亂行而桀紂亡百六爲霖旱之災
七九非湯堯之運曆數斯在惟德動天禍福無門惟人
所召故德者五行之義也人者兩儀之心也人心動而
悔愆生德義形而陰陽謝必乘金運則殷不及於期果
歷木行則周不及於數龍鬪龜祆之發人與事並白魚
丹雀之符德將時應

原解唐柳宗元貞符解曰孰稱古初樸蒙倥侗而無爭
厥流以訛越乃奮擊鬪怒震動專肆爲淫威曰是不知
道惟人之初總總而生林林而羣雪霜風雨雷電暴其
外於是乃知架巢空穴挽草木取皮革飢渴牝牡之欲
毆其內於是乃知噬禽獸咀果穀合偶而居交焉而爭
際焉而鬪力大者搏齒利者齧爪剛者凌羣衆者軋兵
良者殺披披藉藉草野塗血然後強而有力者出而治
之往往爲於險阻號令起而君臣什伍之法立德紹者
嗣道怠者奪於是有聖人焉曰黃帝造其兵車交貫乎
其內一統類齊制量然猶大公之道不克建於是有聖

人焉曰堯置州牧四岳時而綱之立有德有功有才有能者叅而維之運臂率指屈伸把握莫不統率堯年老舉聖人而禪焉大公乃克建由是觀之厥初罔不極亂而後稍可爲也非德不樹故仲尼敘書於堯曰克明峻德於舜曰濬哲文明於禹曰文命祗承于帝於湯曰克寬克仁彰信兆民於武王曰有道曾孫稽揆典誓貞哉惟茲德實受命之符以奠永祀後之妖淫嚚昏好怪之徒乃始陳大電大虹无鳥巨跡白狼白魚流火之鳥以爲符斯皆詭譎闊誕甚可羞也而莫知本於厥貞漢用大度克懷於有岷登能庸賢濯瘳煦寒以瘳以熙茲其

爲符也而其妄臣乃下取虺蛇上引天光推類號休用夸誣於無知之氓增以騶虞神鼎脅毆縱史俾東之泰山石閭作大號謂之封禪皆尚書所無有莽述承效卒奮驚逆其後有賢帝曰光武克綏天下復承舊物猶崇赤伏以玷厥德魏晉而下靡亂鉤裂厥符不貞邦用不靖亦罔克久駁乎無以議爲也積大亂至於隋氏環四海以爲鼎跨九垓以爲鑪鑿以毒燎扇以虐燄其人沸湧灼爛號呼騰蹈莫有救止於是大聖乃起丕降霖雨濬滌蕩沃蒸爲清氣疏爲冷風人乃溲然休然相睇以生相持以成相弭以寧椽斲屠剔膏流節離之禍不作

而人乃克完平舒愉尸其肌膚以達於夷途焚拆抵擣
奔走轉徙之害不起而人乃克鳩類集族歌舞悅懌用
祇於元德徒奮袒呼犒迎義旅謹動六合至於麾下大
盜豪據阻命遏德義威殄戮咸墜厥緒無劉於虐人乃
並受休嘉去隋氏克歸於唐躑躅謳歌灑灑和寧帝庸
威栗惟人之為敬奠厥賦積藏於下是謂豐國鄉為義
廩斂發謹飭歲丁大禋人以有年簡於厥刑不殘而懲
是謂嚴威小屬而友大生而孳愷悌祇敬用底於理凡
其所欲不謁而獲凡其所惡不祈而息四夷稽服不作
兵革不竭貨力丕揚於後嗣用垂於帝式十聖濟厥治

孝仁寬平惟祖之則澤久而愈深仁增而益高人之戴
唐永永無窮是故受命不於天於其人休符不於祥於
其仁惟人之仁匪祥於天匪祥於天茲惟貞符哉未有
喪仁而久者也未有恃祥而壽者也帝曰謚哉乃黜休
祥之奏究貞符之奧思德之所未大求仁之所未備以
底於邦治以敬於人事其詩曰於穆敬德黎人皇之惟
貞厥符浩浩將之仁函於膚刀莫畢屠澤燠於爨沸炎
以澣殄厥凶德乃毆乃夷懿其休風是煦是吹父子熙
熙相寧以嬉賦徹而藏厚我糗糧刑輕以清俾我靡傷
貽我子孫百代是康十聖嗣於理神后之子子思孝父

易患於已拱之戴之神其祐爾載揚於雅承天之嘏天之誠神宜鑒於仁神之曷依宜仁之歸濮汭於北祝粟於南幅員西東祗一乃心祝唐之紀後天罔墜祝皇之壽與地咸久曷徒祝之心誠篤之戶協人同道以告之俾億萬年不震不危我代之延永永毗之仁增以崇曷不爾思有號於天僉曰嗚呼咨爾皇靈無替厥符

淵鑑類函卷四十七

